

ChL 2720.1132


七
八

CHINESE-JAPANESE COLLECTION
HARVARD COLLEGE LIBRARY
FROM HARVARD-YENCHING INSTITUTE

SEP 20 1932

明史彙編卷一百六十二至一百六十五

68



明史藁

列傳第一百六十二

光祿大夫 經筵講官明史總裁戶部尚書加七級 臣王鴻緒奉

敕編撰

文苑二

哈佛大學
圖書館
珍藏印

林鴻 王 傅等 高棟 王紱 夏 景

沈度 弟 粲 聶大年 湯胤勛 陳 第

劉溥 蘇 平等 張弼 張泰 陸 容

程敏政 羅玘 儲燿

楊循吉 桑 悅 祝允明 唐寅

李夢陽 康 海 王九思 何景明

徐禎卿 邊貢 顧璘 弟 琛

王 九章
朱應登

鄭善夫 股雲霄
方 豪

王廷陳

李 濂

楊 慎

林鴻字子羽福清人洪武初以人才薦授將樂縣訓導歷禮部精膳司員外郎太祖臨軒試龍池春曉孤雁二詩稱旨性脫落不善仕年未四十自免歸閩中善詩者稱十才子鴻為之冠十才子者閩鄭定侯官王褒唐泰長樂高棟王恭陳亮永福王偁及鴻弟子周元黃元時人目為二元者也鴻之論詩大指謂漢魏骨氣雖雄而菁華不足晉祖元虛宋尙條囑齊梁以下但務春華少秋實惟唐作者可謂大成然貞觀尙習故陋神龍漸變常調開元天寶間聲律大備學者當以是為楷式閩人言詩者率本於鴻晉府引禮舍人浦源字長源

無錫人也慕鴻名踰嶺訪之造其門二元請誦所作曰吾家詩也以告鴻鴻遂延之入社鄭定字孟宣嘗為陳友定記室友定敗浮沔亡交遊歸之還居長樂洪武中徵授延平府訓導歷齊府紀善國子監教王褒字中美鴻之兄子培也為長沙守官遷永豐知縣元中召入與修大典擢漢府紀善唐泰字亨仲洪武二十七年進士除行人歷陝西副使王恭字安中隱居七巖山自稱皆山樵者永樂初以儒士薦起待詔翰林年六十餘預修大典書成授翰林院典籍陳亮字景明自以故元儒生明興累詔不出作陳搏傳以見志結草屋滄洲中與三山耆彥為九老會終其身不仕王偁字孟敷父翰仕元抗節死偁方九歲父友吳海撫教之洪武中領鄉薦

入國學陳情養母母歿廬墓六年永樂初用薦授翰林檢討
與修大典學博才雄最爲解縉所重自負無輩行獨推讓同
官王洪王洪者字希範錢塘人八歲能文十八成進士授吏
科給事中改翰林檢討偕解等與修大典歷修撰侍講帝頒
佛曲於塞外命洪爲文邊巡不應詔爲同列所排不復進用
卒官而僭後坐累謫交阯復以縉事連及繫死獄中黃元字
元之將樂人聞鴻棄官歸遂攜妻子居閩縣以歲貢官泉州
訓導周元字微之閩縣人永樂中以文學徵拜禮部員外郎
嘗挾書千卷止高棟家讀十年辭去盡棄其書曰在吾腹笥
矣同時趙廸林敏陳仲宏鄭關林伯璟張友謙亦以能詩名
皆鴻之弟子

高棟字彥恢長樂人永樂初自布衣召入翰林爲待詔更名
廷禮別號漫士久之遷典籍性善飲喜談諱工書畫尤專於
詩嘗采唐人所作以體類從依世次定品目曰唐詩品彙九
十卷拾遺十卷又擇其尤合格者爲唐詩正聲十二卷論者
謂其所采擇嚴於音節疎於神理然棟之言曰余夙耽詩恒
欲窺唐人之藩籬首踵其域如墮終南萬壑間茫然不知其
所往然後左攀右陟晨躋夕覽下上登頓進退周旋歷數十
年厥中僻蹊通莊高門邃室歷歷可指數蓋其學之專如是
終明之世館閣宗之

王紱字孟端無錫人博學工歌詩能書寫山水竹石妙絕一
時洪武中坐累戍朔州永樂初用薦以善書供事文淵閣久

之除中書舍人紱未仕時與吳人韓奕為友隱居九龍山遂自號九龍山人於書法動以古人自期畫不苟作游覽之頃酒酣握筆長廊素壁淋漓霑灑有投金帛購片楮者輒拂袖起或閉門不納甚至詬厲勿顧也人有諫之者紱曰丈夫宜審所處輕者如此重者將何以哉在京師月下聞吹簫聲乘興寫竹石圖明旦訪其人贈之則估客也客以紅璣瑜餽請再寫一枝為配紱笑曰我為簫聲訪汝以簫材報汝汝俗子也索前畫裂之還其餽一日退朝黔國公沐晟從後呼其字紱不應同列語之曰此黔國公也紱曰我非不聞之是必與我索畫耳晟走及之果以畫請紱領之而已踰數年晟復以書來紱始為作畫既而曰我畫直遺黔公不可黔公客平仲

微者我友也以友故與之俟黔公與求則可耳其高介絕俗如此崑山夏景者亦善畫竹石亞於紱畫竹一枝直白金一錠然人多以餽遺得之景字仲昭永樂十三年進士改庶吉士尋除中書舍人轉吏部考功主事出知瑞州府擢太常少卿進本寺卿景與上元張益同中進士同以文名同善畫竹其後景見益石渠閣賦自謂不如遂不復作賦益見景所畫竹石亦遂不復畫竹益死土木之難仲微名顯錢塘人嘗知滕縣事謫戍雲南其為詩頗豪放自喜雲南詩人稱平居陳郭顯其一也

沈度字民則弟榮字民望松江華亭人兄弟皆善書度以婉麗勝榮以迢逸勝度博涉經史為文章絕去浮靡洪武中舉

文學弗就坐累謫雲南岷王具禮幣聘之數進諫未幾辭去都督瞿能與偕入京師成祖初卽位詔部簡能書者入翰林給廩祿度與吳縣滕用亨長樂陳登同與選是時解縉胡廣梁潛王璉皆工書度至最爲帝所賞名出朝士右日侍便殿凡金版玉冊用之朝廷藏祕府頒屬國必命之書遂由翰林典籍擢檢討歷修撰遷侍講學士粲自翰林待詔遷中書舍人擢侍讀進階大理少卿兄弟並賜織金衣鏤姓名於象簡泥之以金贈父母如其官馳驛傳歸告於墓崑山夏昺者字孟暘與其弟杲以善書畫聞同官中書舍人時號大小中書而度粲號大小學士度性敦實謙以下人嚴取與有訓導介其友求書請識姓字於上度沈思曰得非曩評奏有司者耶

遽却之其友固請終不肯書姓名其在內廷備顧問必以正對粲篤於事兄已有賜輒歸其兄度子藻官中書舍人用亨初名權字用衡精篆隸書被薦特年七十矣召見大書麟鳳龜龍四字以進又獻貞符詩三篇授翰林待詔與修永樂大典用亨善鑿古嘗侍帝觀畫卷未竟衆目爲趙伯駒用亨曰此王詵筆也至卷尾果然登字思孝初仕羅田縣丞改蘭谿再改浮梁遷入翰林仍給縣丞祿歷十年始授中書舍人登之入也用亨自詡篆籀謂天下無踰之者且恃年高數面折登登勿與校至三日猶不已登從容進曰登幸在此願有所質乃就用亨言兵於說文者十數事援許氏說證之用亨乃屈服登於六書本原博考詳究用力甚勤自周秦以來殘碑

斷碣必窮搜摩搨審度而辨定之得其傳者太常卿南城程南雲也

聶大年字壽卿臨川人父同文洪武中官翰林侍書中書舍人燕王入京師迎謁道暍死死後五月而大年生母胡撫之比長博學善詩古文葉盛稱其詩謂三十年來絕唱也書得歐陽率更法宣德末薦授仁和訓導母卒歸葬哀感行路里人列其母子賢行上之有司詔旌其門服闋分教常州遷仁和教諭景泰六年薦入翰林未幾得疾卒始尚書王直以詩寄錢塘戴文進索畫自序昔與文進文嘗戲作詩一聯至是十年始成之大年題其後曰公愛文進之畫十年不忘使以是心待天下賢者天下寧復有遺賢哉直聞其言不怒亦不

薦及大年疾篤作詩貽直有鏡中白髮孰憐我湖上青山欲待誰句直曰此欲吾志其墓耳遂為之志

湯肩勣字公讓東甄王和曾孫也讀書過目成誦好談天下事與人語不合輒罵辱或拳搏之游江陰見民惡其令率少年上聽事反縛之狀其罪於上官上官大駭并收下獄數歲赦還巡撫周忱送補應天諸生甫七日忤京尹為所笞走出學門題詩扉上遂棄諸生游江湖間景泰初詔求將才忱以肩勣應召入都試於兵部尚書于謙谷以古今將略及諸史中事應答無爽謙大稱異言於朝授錦衣百戶會方擇人使瓦刺即擢千戶副楊善趙榮偕行既抵可汗脫脫不花所問中朝事榮語稍遲肩勣掀髯對甚悉時箕踞岸幘以示無懼

歸二年尚書胡濙等應詔舉將材擢忠義前衛署指揮僉事時瓦剌已講好塞上久息兵諸將又忌肩勣材不令治事鬱鬱無所見乃放意詩酒日與劉溥王淮輩唱和為樂天順中錦衣領事者撫肩勣舊過以聞下詔獄落職為民荷杖出都門故人唁之仰天大笑曰子以一指揮為足榮湯生耶掉頭去不顧憲宗立復故官成化三年以薦擢署都指揮僉事為延綏東路右參將分守孤山堡孤山最當寇衝又無城郭寇歲數入守將黜謫相踵肩勣奉詔歎曰噫吾死矣既至草奏數千言請築城聚糧增壯士戍守未報寇大至肩勣方病力疾上馬率指揮趙昊等禦之陷伏死昊走還事聞贈祭如制明世武將能文者郭登俞大猷戚繼光之屬以功名顯而肩勣以詩著萬曆中連江陳第字季立為諸生用譚綸薦起家京營裨將出守古北口歷薊鎮游擊將軍善詩深於經學其著述為尤富云

劉溥字原博長洲人祖彥父士賓皆以醫得官溥八歲賦溝水詩時目為聖童長侍祖父游兩京研究經史兼通天文曆數宣德時以文學徵有言其善醫者授惠民局副使正統末京師牛產子五足一生於項蹄上出溥占之曰此小人在上四裔侵陵象也尋有土木之變用久次調太醫院吏目恥以醫自名日吟詠為事其詩初學西崑後更奇縱與湯肩勣蘇平蘇正沈愚王淮晏鐸鄒亮蔣忠王貞慶號景泰十才子溥為主盟肩勣尤自豪然遇溥輒服平字秉衡弟正字秉貞海

寧人兄弟並以布衣終患字通理崑山人業醫終其身淮字柏源慈谿人長身美鬚嘗與肩勣遇於湖州慈感寺徵青陵臺事各得其二淮掀髯曰君止是乎復舉其一歷歷口誦無所遺肩勣大歎服鐸字振之富順人由庶吉士授御史歷按兩畿山東所至有聲坐言事謫上高典史鄰境寇發官兵不能討鐸捕滅之歸所掠於民亮字克明長洲人用況鍾薦擢吏部司務遷御史忠字主忠儀真人徙居句容貞慶字善甫駙馬都尉寧子也折節好士有詩名時稱金粟公子

張弼字汝弼別號東海松江華亭人成化二年進士授兵部主事進員外郎遷南安知府地當兩廣衝奸人聚山谷爲惡悉捕滅之毀淫祠百數十區建爲社學謝病歸士民爲立祠

弼自幼穎拔善詩文工草書怪偉跌宕震撼一世張東海之名流播外裔爲詩信手縱筆多不屬稿卽有所屬以書故輒爲人持去與李東陽謝鐸善嘗自言吾平生書不如詩詩不如文東陽戲之曰英雄欺人每如此不足信也鐸稱其好學不倦詩文成一家言子弘至自有傳

張泰字亨父太倉人陸鉞字鼎儀崑山人陸容字文量亦太倉人三人少齊名號婁東三鳳泰舉天順八年進士選庶吉士授檢討遷修撰爲人恬淡自守詩名亞李東陽弘治間藝苑皆推李懷麓張滄洲東陽有懷麓堂集泰有滄洲集也鉞與泰同年進士殿試第二授編修歷修撰諭德孝宗立以東宮講讀勞進太常少卿兼侍讀得疾歸泰鉞皆早卒兩人詩

東陽嘗稱之而惜其天不假以年也容成化中進士授南京主事進兵部職方郎中西番進獅子奏請大臣往迎容諫止之遷浙江參政罷歸

程敏政字克勤十歲侍父信官四川巡撫羅綺以神童薦英宗召試悅之詔讀書翰林院給廩饌學士李賢彭時呂原中允劉珣咸愛重之賢以女妻焉成化二年進士及第授編修歷左諭德直講東宮翰林中學問該博稱敏政文章古雅稱李東陽性行真純稱陳音各爲一時冠孝宗嗣位以宮僚恩擢少詹事兼侍講學士直經筵敏政名臣子才高負文學常俯視儕偶頗爲人所疾弘治元年冬御史王嵩等以雨災劾敏政因勒致仕五年起官尋遷太常卿兼侍讀學士掌院事

進禮部右侍郎專典內閣誥敕十二年與李東陽主會試舉人徐經唐寅預作文與試題合給事中華某劾敏政鬻題時榜未放詔敏政毋閱卷其所錄者令東陽會同考官覆校二人卷皆不在所取中東陽以聞言者猶不已敏政某經寅俱下獄坐經嘗贊見敏政寅嘗從敏政乞文黜爲吏敏政勒致仕而某以言事不實調南太僕主簿敏政出獄四日憤恚發癰卒後贈禮部尚書或言敏政之獄傅瀚欲奪其位令某奏之事祕莫能明也

羅玘字景鳴南城人博學好古文務爲奇奧年四十困諸生輸粟入國學丘濬爲祭酒議南人不得留北監玘固請受扑猶不已濬嘗之曰若識幾字嘔彊乃爾玘仰對曰惟中祕書

未讀耳濬姑留之他日試以文乃大驚異成化末領京闈鄉試第一明年舉進士選庶吉士授編修益肆力古文每有作或據高樹或閉坐一室瞑目隱度形容灰槁自此文益奇玘亦厚自負尤尚節義臺諫救劉遜盡下獄玘言當優容以全國體中官李廣死遺一籍具識大臣賄交者帝怒命言官指名劾奏玘上言曰大臣表正百僚今若此固宜宣重典然天下及四裔皆仰望之一旦指名暴其惡啓遠人慢朝廷心言官未見籍記憑臆而論安辨玉石一經攻摘日玷終身臣請降敕密諭使引疾退或斥以他事庶不爲朝廷羞而仕路亦清南京科道楊廉洪遠等交章劾玘妄言亂聽且言尚書屠浦白昂必不可不去帝不問其後以天變黜大臣竟如玘言

秩滿進侍讀李夢陽下獄玘言壽寧侯託肺腑當有以保全之夢陽不保爲侯累帝深納焉正德初遷南京太常少卿劉瑾亂政李東陽依違其間玘東陽所舉士也貽書責以大義且請削門生之籍尋進本寺卿擢南京吏部右侍郎遇事嚴謹僚屬畏憚畿輔盜縱橫而皇儲未建玘疏論激切且侵執政者七年冬考績赴都遂引疾致仕歸寧王宸濠慕其名遣使餽玘避之深山及叛玘已病馳書守臣約討賊事未舉而卒嘉靖初賜諡文肅學者稱圭峰先生

儲囁字靜夫秦州人九歲能屬文母疾剖股療之卒不起家貧力營墓域旦哭冢夜讀書不輟成化十九年鄉試明年會試皆第一授南京吏部考功主事孝宗嗣位疏薦前直諫貶

謫者主事張吉王純中書舍人丁璣進士李文祥吉等皆錄
用久之進郎中吏部尚書耿裕知其賢調北部考注臧否一
出至公嘗覈實一官裕欲改其評囁正色曰公所執何異王
介甫羣僚咸在側裕大慚徐曰郎中言是然非我莫能容也
擢太僕少卿請命史官記注言動如古左右史時不能用進
本寺卿武宗立塞上有警條禦邊五事又陳馬政病民者四
事多議行正德二年改左僉都御史總督南京糧儲召爲戶
部右侍郎尋轉左督倉場所至宿弊盡釐劉瑾用事數凌侮
大臣獨敬囁稱爲先生囁憤其所爲五年春引疾求去詔許
乘傳有司俟疾痊以聞其秋璫敗以故官召辭不赴後起南
京戶部左侍郎就改吏部卒官囁體貌清羸若不勝衣淳行

清修介然自守工詩文好推引知名士辟遠非類不惡而嚴
進士顧璘嘗謁尙書邵寶寶語曰子立身當以柴墟爲法柴
墟者囁別號也嘉靖初賜諡文懿

楊循吉字君謙吳縣人成化二十年進士授禮部主事善病
好讀書每得意手足踣掉不能自禁也用是得顛主事名一
歲中數移病不出弘治初請致仕歸年纔三十有一結廬支
硯山下課讀經史旁通內典裨官性狷隘好以學問窮人至
頰赤不顧清寧宮災詔求直言馳疏請復建文帝尊號格不
行父母旣歿傾貲治墳寢苦境側武宗駐蹕南都用伶人薦
名賦打虎曲稱旨易武人裝日侍御前爲樂府小令帝以優
俳畜之不授官循吉以爲恥閏九月辭歸旣復召至京會帝

崩乃還嘉靖中獻九廟頌及華陽求嗣齋儀報聞而已晚歲
落寞益堅癖自好尚書顧璘道吳訪之促膝論文歡甚俄郡
守邀璘璘將赴之循吉忽色變曰楚人敢與貴人爭客耶明
日璘往謝閉門不納卒年八十九其詩文雜集幾及千卷而
俚近者居多時同郡有桑悅戴冠悅字民懌常熟人書過目
輒焚棄曰已在吾腹中矣敢為大言以孟子自況其生平可
笑類此舉成化元年鄉試授泰和訓導學士丘濬召觀所為
文給曰出某集悅笑曰公謂悅不怯穢耶乃以若文令悅觀
濬內慚不忤也濬屬學使者善遇之尋遷長沙判調柳州會
艱歸遂不出居家益狂誕鄉人莫不駭之冠字章甫長洲人
篤學嗜古自經史外方術百家莫不綜貫名籍籍諸生聞弘

治初歲貢授紹興訓導罷歸一人詩文名亞於循吉

祝允明字希哲長洲人祖顯正統四年進士內侍傳旨試能
文者四人顯與焉入掖門知欲令教小內豎也不試而出出
給事中歷山西參政並有聲允明以弘治五年舉於鄉久之
不第授廣東興寧知縣捕戮盜魁三十餘邑以無警稍遷應
天通判謝病歸嘉靖五年卒允明生而枝指故自號枝山又
號枝指生五歲作徑尺字九歲能詩稍長博覽羣籍文章有
奇氣當筵疾書思若湧泉尤工書法名動海內好酒色六博
善新聲求文及書者踵至多賄妓掩得之惡禮法士亦不問
生產有所入輒召客豪飲費盡乃已或分與持去不留一錢
窘乏時黠者或持少銀米可文若書輒應之已少饒更自貴

也晚益困每出追呼索逋者相隨於後允明益自喜所著有詩文集六十卷他雜著百餘卷子續正德中進士仕至廣西左布政使

唐寅字伯虎一字子畏吳縣人性穎利與里狂生張靈縱酒不事諸生業祝允明規之乃閉戶浹歲舉弘治十一年鄉試第一座主梁儲奇其文還朝示學士程敏政敏政亦奇之未幾敏政總裁會試江陰富人徐經賄其家僮得試題事露寅友人都穆搆其事言者劾敏政語連寅下詔獄謫爲吏寅恥不就歸家益放浪後緣小故去其妻家無餘石客座嘗滿自署其章曰江南第一風流才子寧王宸濠厚幣聘之寅察其有異志佯狂使酒露其醜穢宸濠不能堪放還築室桃花塢

與客日般飲其中年五十四而卒寅詩文初尙才情晚年頹然自放謂後人知我不在此論者傷之穆字元敬吳縣人弘治十二年進士官至太僕少卿里人娶婦夜雨滅燭徧乞火不得或言南濠都少卿家有讀書燈往叩果然其老而好學如此以陷寅爲世所薄云

李夢陽字獻吉慶陽人父正官周王府教授徙居開封母夢日墮懷而生故名夢陽弘治六年舉陝西鄉試第一明年成進士授戶部主事晉郎中權關格勢要搆下獄得釋十八年應詔上書陳二病三害六漸凡五千餘言極論得失語繁不載末言壽寧侯張鶴齡招納無妄罔利賊民勢如翼虎鶴齡奏辨摘疏中陛下厚張氏語誣夢陽訕母后爲張氏罪當斬

時皇后有寵后母金夫人泣懇帝帝不得已繫夢陽錦衣獄尋宥出奪休金夫人懇不已帝弗聽召鶴齡問處切責之鶴齡免冠叩頭乃已左右知帝護夢陽請母重罪而予杖以洩金夫人憤帝又弗許謂尙書劉大夏曰若輩欲以杖斃夢陽耳吾寧殺直臣快左右心乎他日夢陽途遇壽寧侯嘗之擊以馬箠墮二齒壽寧侯不敢校也孝宗崩武宗立劉瑾等入虎用事尙書韓文與其僚語及而泣夢陽進曰公大臣何泣也文曰柰何曰比言官劾羣奄閣臣持其章甚力公誠率諸大臣伏闕爭閣臣必應之去若輩易耳文曰善君爲我屬草草成入奏會語洩文等皆逐去瑾深憾之矯旨謫山西布政司經歷勒致仕既而瑾復擴他事下夢陽獄將殺之康海爲

說瑾乃免瑾誅起故官遷江西提學副使令甲副使屬總督夢陽不肯屬也總督陳金惡之監司五日會揖巡按御史夢陽又不往揖且敕諸生毋謁上官卽謁長揖毋跪御史江萬實亦惡夢陽淮王府校與諸生爭夢陽箠校王怒奏之未下御史萬實亦督責諸生夢陽手銀鐐率諸生往鎖之萬實走免而淮王奏適下御史按察夢陽恐萬實右王訐萬實詔下總督金行勘金檄布政使鄭岳勘之夢陽僞撰萬實劾金疏以激怒金并構岳子法通賄事寧王宸濠者浮慕夢陽嘗請撰陽春書院記又惡岳乃助夢陽劾岳囚掠法吉安知府劉喬爲夢陽所挫辱求夢陽短及僞爲奏草事自萬實令奏之萬實上奏卽謝病去夢陽又與參政吳廷舉有隙廷舉亦上

疏論其侵官不俟命徑去事復下金金奏曰臣不敢復勘夢陽詔遣大理卿燕忠往鞫召夢陽羈廣信獄諸生萬餘爲訟冤不聽劾夢陽凌轢同列挾制上官遂以冠帶閒住去亦褫岳喬職戍沅奪廷舉俸夢陽旣家居益斲弛負氣治園池招賓客日縱俠少射獵繁臺晉丘間自號空同子海內慕其名趨謁夢陽往往不爲禮宸濠反誅御史周宣劾夢陽黨逆被逮大學士楊廷和尙書林俊力救之坐前作書院記削籍頃之卒子枝進士夢陽才思雄鷲卓然以復古自命弘治特宰相李東陽主文柄天下翕然宗之夢陽獨譏其萎弱倡言文必秦漢詩必盛唐非是者弗道與何景明徐禎卿邊貢朱應登顧璘陳沂鄭善夫康海王九思等號十才子又與景明禎

卿貢海九思王廷相號七才子首卑視一世而夢陽尤甚吳人黃省曾越人周祚千里致書願爲弟子迨嘉靖朝李攀龍王世貞出復奉以爲宗天下推李何王李爲四大家無不爭效其體華州王維楨以爲七言律自杜甫以後善用頓挫倒插之法惟夢陽一人而後有譏夢陽詩文者則謂其模擬剽竊得史遷少陵之似而失其真云海字德涵武功人弘治十五年殿試第一授修撰與夢陽輩相倡和訾議諸先達忌者頗衆正德初劉瑾亂政以海同鄉慕其才欲招致之海不肯往會夢陽下獄書片紙招海曰對山救我對山者海別號也海乃謁瑾瑾大喜爲倒屣迎海因設詭辭說之瑾意解明日釋夢陽海自是與瑾往還踰年瑾敗海坐黨落職九思字敬

夫鄆人弘治九年進士由庶吉士授檢討尋調吏部至郎中亦以瑾黨謫壽州同知復被論勒致仕海九思同里同官同以瑾黨廢每相聚泝東鄆杜間挾聲伎酣飲製樂造歌曲自比俳優以寄其怫鬱九思嘗費重貲購樂工學琵琶海撈彈尤善後人傳相倣效大雅之道微矣維楨字允寧嘉靖十四年進士擢庶吉士累官南京國子祭酒家居地大震壓死維楨頽而哲自負經世才職文墨不得少效於世每好酒謾罵人多畏而遠之於文好司馬遷於詩好杜甫而其意以夢陽兼此二人終身所服膺效法者夢陽也

何景明字仲默信陽人八歲能詩古文弘治十一年舉於鄉年方十五宗藩貴人爭遣人負視所至聚觀者堵十五年第

進士授中書舍人與李夢陽輩倡古詩文夢陽最雄駿景明稍後出相與頡頏正德改元劉瑾竊柄上書吏部尚書許進勸其秉政毋撓語極激烈已遂謝病歸踰年瑾盡免諸在告者官景明坐罷瑾誅用李東陽薦起故秩直內閣制敕房李夢陽下獄衆莫敢爲直景明上書吏部尚書楊一清救之九年乾清宮災疏言義子不當畜邊軍不當留番僧不當寵宦官不當任留中久之進吏部員外郎直制敕如故錢寧欲交驩以古畫素題景明日此名筆母汚人手留經年終擲還之尋擢陝西提學副使廖鵬弟太監鑾鎮關中橫甚諸參隨遇三司不下馬景明執撻之其教諸生專以經術世務遴秀者於正學書院親爲說經不用諸家訓詁士始知有經學嘉靖

初引疾歸未幾卒年三十有九景明志操耿介尚節義鄙榮
利與夢陽並有國士風兩人爲詩文初相得甚歡名成之後
互相詆謫夢陽主摹倣景明則主剗造各樹堅壘不相下兩
人交游亦遂分左右袒說者謂景明之才本遜夢陽而其詩
秀逸穩稱視夢陽麤浮剽竊反爲過之然天下語詩文必並
稱何李又與邊貢徐禎卿並稱四傑其持論謂詩溺於陶謝
力振之古詩之法亾於謝文靡於隋韓力振之古文之法亾
於韓頗爲時所譏

徐禎卿字昌穀吳縣人資穎特家不蓄一書而無所不通自
爲諸生已工詩歌與里人唐寅善寅言之沈周楊循吉由是
知名舉弘治十八年進士孝宗遣中使問禎卿與華亭陸深

名深遂得館選而禎卿以貌寢不與授大理左寺副坐失囚
貶國子博士禎卿少與祝允明唐寅文徵明齊名號吳中四
才子其爲詩喜白居易劉禹錫旣登第與李夢陽何景明游
悔其少作改而趨漢魏盛唐然故習猶在夢陽譏其守而未
化卒年二十有三禎卿體癯神清詩鎔鍊精警爲吳中詩人
之冠年雖不永名滿士林子伯虬舉人亦能詩

邊貢字廷實歷城人祖寧應天治中父節代州知州貢年二
十舉於鄉第弘治九年進士除太常博士擢兵科給事中孝
宗崩疏劾中官張瑜太醫劉文泰高廷和用藥之謬又劾中
官苗達保國公朱暉都御史史琳用兵之失改太常丞遷衛
輝知府改荊州並能其官歷陝西河南提學副使以母憂家

居嘉靖改元用薦起南京太常少卿三遷太常卿督四夷館擢刑部右侍郎拜戶部尚書並在南京貢早負才名美風姿所交悉海內名士久官留都優閒無事游覽江山揮毫浮白夜以繼日都御史劾其縱酒廢職遂罷歸生平好蓄書積至數萬卷一夕火幾盡仰天大哭曰天喪我也遂發病卒

顧璘字華玉上元人弘治九年進士授廣平知縣擢南京吏部主事晉郎中正德四年出爲開封知府數與鎮守大監廖堂王宏忤逮下錦衣獄謫全州知州秩滿遷台州知府歷浙江左布政使山西湖廣巡撫右副都御史所至有聲遷吏部右侍郎改工部董顯陵工畢遷南京刑部尚書罷歸年七十餘卒璘少負才名與何李相上下虛已好士如恐不及在浙

慕孫太初一元不可得見道衣幅巾放舟湖上月下見小舟泊斷橋一僧一鶴一童子煮茗笑曰此必太初也移舟就之遂往還無間撫湖廣時愛王廷陳才欲見之廷陳不可偵廷陳狎游疾掩之廷陳避不得遂定交既歸構息園大治幸舍居客客常滿從弟璵字英玉以河南副使歸家居園側一小樓教授自給璘時時與客豪飲伎樂雜作呼璵璵終不赴其孤介如此初璘與同里陳沂王韋號金陵三俊其後寶應朱應登繼起稱四大家璘詩矩矱唐人以風調勝韋婉麗多致頗失纖弱沂與韋同調應登才思泉湧落筆千言然璘應登羽翼李夢陽而韋沂則頗持異論三人者仕宦皆不及璘沂字魯南正德中進士由庶吉士歷編修侍講出爲江西參議

量移山東參政以不附張孚敬桂萼改行太僕卿致仕韋字欽佩父徽成化時給事中直諫有聲韋舉弘治中進士由庶吉士歷官太僕少卿子逢元亦能詩應登字升之弘治中進士歷雲南提學副使遷參政恃才傲物中飛語罷歸子曰藩嘉靖間進士終九江知府能文章世其家南都自洪永初風雅未暢徐霖陳鐸金琮謝璿輩談藝正德時稍稍振起自麟三詞壇士大夫希風附塵厥道大彰許穀陳鳳璿子少南金大車大與金鑾盛時泰陳芹之屬並從之游穀等皆里人鑿僑居客也儀真蔣山卿江都趙鶴亦與璿遙相應和浴及未造風流未歇云

鄭善夫字繼之閩縣人弘治十八年進士連遭內外艱正德六年始爲戶部主事權稅泮墅以清操聞時劉瑾雖誅嬖倖用事善夫憤之乃告歸築草堂金菴峰下爲遲清亭讀書其中曰俟天下之清也巖居六載寡交游日晏未炊欣然自得起禮部主事進員外郎武宗將南巡偕同列切諫杖於廷罰跪五日善夫更爲疏草置懷中屬其僕曰死即上之幸不死歎曰時事若此尙可靦顏就列哉乞歸未得明年力請乃得歸嘉靖改元用薦起南京刑部郎中未上改吏部行抵建寧便道游武夷九曲風雪絕糧得病卒年三十有九善夫敦行誼婚嫁七弟妹貴悉推予之葬母黨二十二人所交盡名士與孫一元殷雲霄方豪尤友善作詩力摹少陵疾時汙濁多悲憤語雲霄字近夫壽張人善夫同年進士作蓄艾堂聚書

數千卷以作者自命正德中官南京給事中武宗納有娠女子馬姬宮中雲霄偕同官疏諫引李園呂不韋事為諷不報卒官年三十有七鄉人穆孔暉畏雲霄峭直曰殷子恥不善不啻負穢然豪字思道開化人正德三年進士除崑山知縣遷刑部主事諫武宗南巡跪闕下五日復受杖歷官湖廣副使罷歸一元見隱逸傳閩中詩文自林鴻高棟後閱百餘年善夫繼之風雅復振焉

王廷陳字穉欽黃岡人父濟吏部郎中廷陳穎慧絕人幼好弄父扶之輒大呼曰大人柰何虐天下名士正德十二年成進士選庶吉士益恃才放恣故事兩學士為館師體嚴重廷陳伺其退食獨上樹杪大聲叫呼兩學士無如之何佯弗聞

也武宗下詔南巡與同館舒芬等七人將疏諫館師石岳力止之廷陳賦烏母謠大書於壁以刺岳及執政皆不悅已而疏上帝怒罰跪五日杖於廷時已改吏科給事中乃出為裕州知州廷陳不習為吏又失職怨望簿牒堆案漫不省視夏日裸跣坐堂皇見飛鳥集庭樹輒止訟者取彈彈之民有罪當杖令輸彈丸二十卽免居恒無所發憤遇囚榜掠過當上官行部不出迎曰是皆盲子足當王生迎耶已而布政使陳鳳梧及巡按御史喻茂堅先後至廷陳以鳳梧座主特出迓鳳梧好謂曰子候我固善御史卽來候之當倍謹廷陳許諾及茂堅至銜其素驕蹇有意裁抑之以小過榜州吏廷陳為跪請茂堅故益甚廷陳大罵曰陳公誤我直上堂搏茂堅悉

呼吏卒出鎖其門禁絕供億且將具奏茂堅大窘鳳梧爲解
乃夜馳去尋上疏劾之適裕人被案者逸出奏廷陳不法事
收捕繫獄削籍歸世宗踐阼前直諫被謫者悉復官獨廷陳
以里吏議不與屏居二十餘年嗜酒縱倡樂益自放廢士大
夫造謁多蓬髮赤足不具實主禮時衣紅紫窄袖衫騎牛跨
馬嘯歌田野閒嘉靖十八年詔修承天大志巡撫顧璘以廷
陳及顏木王格薦書成不稱旨賜銀幣而已廷陳才高詩文
重當世一時才士鮮能過之木應山人官亳州知州格京山
人官河南僉事

李濂字川父祥符人舉正德八年鄉試第一明年成進士授
沔陽知州稍遷寧波同知擢山西僉事嘉靖五年以大計免
職纔三十有八濂少負俊才時從俠少年聯騎出城搏獸
射雉酒酣悲歌慨然慕信陵君侯生之爲人一日作理情賦
友人左國璣持以示李夢陽夢陽大嗟賞訪之吹臺濂自此
聲馳河雒間旣罷歸益肆力於學遂以古文名於時初受知
夢陽後不屑附和里居四十餘年著述甚富

楊慎字用修新都人少師廷和子也年二十二舉正德六年
殿試第一授翰林修撰丁繼母憂服闋起故官十二年八月
武宗微行始出居庸關愼抗疏切諫尋移疾歸世宗嗣位起
充經筵講官常講舜典言聖人設贖刑乃施於小過俾民自
新若元惡大奸無可贖之理時大璫張銳于經論死或言進
金銀獲宥故及之嘉靖三年帝納桂萼張璉言召爲翰林學

士慎偕同列三十六人。言臣等與萼輩學術不同，議論亦異。臣等所執者，程頤、朱熹之說也。萼等所執者，冷袞、段猶之餘也。今陛下既超擢萼輩，不以臣等言爲是，臣等不能與同列。願賜罷斥。帝怒，切責停俸，有差踰月。又偕學士豐熙等疏諫，不得命。偕廷臣伏左順門，力諫。帝震怒，命執首事八人下詔獄。於是慎及檢討王元正、臧門大哭，衆皆哭聲徹殿庭。帝益怒，悉下詔獄。廷杖之，閱十日。有言前此朝罷，羣臣已散，慎元正及給事中劉濟、安磐、張漢卿、張原、御史王時柯實糾衆伏哭，乃再杖七人於廷。慎元正、濟並謫戍，餘削籍。慎得雲南永昌衛，先是廷和當國，盡斥錦衣、冒濫官。及是，伺諸途將害慎，慎知而謹備之。至臨清，始散去扶病馳萬里，憊甚。巡撫黃

衷復促之抵戍，所幾不起。五年，聞廷和疾，馳至家。廷和喜，疾愈還。永昌聞尋甸安銓武足鳳朝文作亂，率僮奴及步卒百餘馳赴木密，所與守臣擊敗賊。八年，聞廷和訃，奔告巡撫歐陽重，請於朝，獲歸葬。葬訖，復還。自是或歸蜀，或居雲南會城，或留戍所。大吏咸善視之。及年七十，還蜀。巡撫王崑遣四指揮手銀鎗命鎖以來，至則崑已去官。慎不久亦卒。嘉靖三十八年七月也。年七十有二。慎幼警敏，十一歲能詩，十二擬作古戰場文，過秦論，長老驚異。入京賦黃葉詩，李東陽見而嗟賞，令受業門下。在翰林時，武宗問欽天監及翰林星，有注張又作汪，張是何星也。衆不能對，慎曰：「柳星也。」歷援周禮史記漢書以復，預修武宗實錄事，必直書總裁蔣冕費宏盡付藁。

草俾削定嘗奉使過鎮江謁楊一清閱所藏書叩以疑義一
清皆成誦慎驚異益肆力古學既投荒多暇書無所不覽嘗
語人曰資性不足恃日新德業當自學問中來故好學窮理
老而彌篤世宗以議禮故惡其父子特甚每問慎作何狀閣
臣以老病對乃稍解慎聞之益縱酒自放嘗以粉傅面作雙
鬚插花令眾妓擁之游行城市諸上官慕其名用精白綾
作被為諸妓服酒闌乞書諸上官輒購歸裝潢成卷慎聞不
惡也明世記誦之博著作之富推慎為第一詩文外雜著至
一百餘種並行於世隆慶初贈光祿少卿天啓中追諡文憲

彙

列傳第一百六十二

明史彙

列傳第一百六十二

光祿大夫 經筵講官明史總裁戶部尚書加七級臣王鴻緒奉
敕編撰

文苑三

文徵明 蔡羽 陸師道 黃省曾 袁宏 袁宏 王寵

周天球 錢穀 陳道復 王穀祥 彭年

王愼中 高叔嗣 蔡汝楠 陳東 李開先

田汝成 皇甫孝 王問

茅坤 謝榛 盧構

李攀龍 梁有譽 宗臣 吳國倫 王世貞 汪道昆 胡應麟

弟世懋 歸有光 胡友信 何良俊 王圻等

徐渭

文徵明長洲人初名璧以字行更字徵仲別號衡山父林溫州知府叔父森右僉都御史林卒吏民贖千金爲賻徵明年十六悉却之吏民修故却金亭以配前守何文淵而記其事徵明幼不慧稍長穎異挺發學文於吳寬學書於李應禎學畫於沈周皆父友也又與祝允明唐寅徐禎卿輩相切磨名日益著其爲人和而介寧王宸濠慕其名貽書幣聘之辭病不赴正德末巡撫李充嗣薦之朝會徵明亦以歲貢生詣都吏部試而才之奏授翰林院待詔世宗立預修武宗實錄侍經筵歲時頒賜與諸詞臣齒而是時專尚科目徵明意不自得連歲乞歸永嘉張璠者林知溫州所造士也方得勢或諷

徵明附之辭不就楊一清召入輔政徵明見獨後一清亟謂曰子不知乃翁與我友邪徵明曰先君棄不肖三十餘年苟以一字及者弗敢忘實不知相公與先君友也一清亦無忤尋與璠謀欲徙徵明官徵明乞歸益力乃獲致仕四方乞詩文書畫者接踵於道書生故人子弟有求輒應而富貴人不易得片楮尤不肖與王府及中人曰此法所禁也周徽諸王以古寶玩爲贈不啓封而還之外國使者道吳門望里肅拜以不獲見爲恨文筆徧天下門下士贗作者頗多徵明亦不禁嘉靖三十八年卒年九十矣長子彭字壽承國子博士次子嘉字休承和州學正竝能詩工書畫篆刻世其家女嫁王氏亦能詩彭孫震孟自有傳吳中自吳寬王鏊以文章領袖

館閣一時名士沈周祝允明輩與竝馳騁文風極天下盛徵明及蔡羽黃省曾袁袞皇甫冲兄弟稍後出而徵明主風雅數十年與之游者王寵陸師道陳道復王穀祥彭年周天球錢穀之屬亦皆以詞翰名於世羽字九遠由國子生授南京翰林院孔目居洞庭西山自號林屋山人有林屋南館二集自負甚高文法先秦兩漢或謂其詩似李賀羽曰吾詩求出魏晉上今乃爲李賀邪其不冝屈抑如此省曾字勉之舉鄉試從王守仁湛若水游又學詩於李夢陽嘗馳書夢陽云李杜詩聖而文格未光韓柳文豪而詩道不粹兼之者實惟我公以是阿夢陽夢陽大悅識者哂之省曾所著有五嶽山人集子姬水字淳父學書於祝允明亦有文名袞字永之七歲

能詩舉嘉靖五年進士改庶吉士張璁惡之出爲刑部主事累遷廣西提學僉事兩廣自韓雍後監司謁督府率庭跪表獨長揖無何謝病歸子尊尼字魯望亦官山東提學副使有文名寵字履吉別號雅宜少學於蔡羽居林屋者三年旣而讀書石湖由諸生貢入國子僅四十而卒行楷得晉法書無所不觀徵明長寵二十四歲折輩行與交王雅宜之名滿天下師道字子傳由進士授工部主事改禮部以養母請告歸歸而游徵明門稱弟子家居十四年乃復起累官尚寶少卿善詩文工小楷古篆繪事人謂徵明四絕不減趙孟頫而師道竝傳之其風尚亦略相似平居不妄交游長吏罕識其面女字卿子適趙宦光夫婦皆有聞於時道復名淳以字行祖

瑀副都御史淳受業於徵明以文行著善書畫自號白陽山人穀祥字祿之由進士改庶吉士歷官吏部員外郎忤尚書汪鋐左遷真定通判以歸與師道俱有清望年字孔嘉其人亦長者天球字公瑕穀字叔寶天球以書穀以畫皆繼徵明表表吳中者也

黃佐字才伯香山人祖瑜長樂知縣以學行聞正德中佐舉鄉試第一世宗嗣位始成進士選庶吉士嘉靖初授編修陳初政要務又請修舉新政疏皆留中尋省親歸使道謁王守仁與論知行合一之旨數相辨難守仁亦稱其直諫還朝會出諸翰林爲外僚除江西僉事旋改督廣西學校聞母病引疾乞休不俟報竟去下巡撫林富逮問富言佐誠有罪第爲

親受過於情可原乃令致仕家居九年會簡宮僚命以編修兼司諫尋進侍讀掌南京翰林院召爲右諭德擢南京國子祭酒母憂服除起少詹事謁大學士夏言與論河套事不合會吏部缺左侍郎所司推禮部右侍郎崔桐及佐給事中徐霈御史艾朴言桐與左侍郎許成名競進至相詬訾而佐及同官王用賓亦爭覲望惟恐或先之宜皆止勿用言從中主之遂皆賜罷佐學以程朱爲宗惟理氣之說獨持一論平生撰述至二百六十餘卷所著樂典自謂洩造化之祕年七十卒穆宗詔贈禮部右侍郎謚文裕佐弟子多以行業自飭而梁有譽歐大任黎民表詩名最著云大任字楨伯順德人由歲貢生歷官南京工部郎中年八十而終民表字惟敬從

化人御史貫子也舉鄉試久不第授翰林孔目遷吏部司務
執政知其能文用爲制敕房中書供事內閣加官至參議
柯維騏字奇純莆田人高祖潛翰林學士父英徽州知府維
騏舉嘉靖二年進士授南京戶部主事未赴輒引疾歸張孚
敬用事荆新制京朝官病滿三年者概罷免維騏亦在罷中
自是謝賓客專志讀書久之門人日進先後四百餘人維騏
引掖靡倦慨近世學者樂徑易而憚積累竊二氏之說以文
其固陋也作左右二銘訓學者以務實以辨心術端趨向爲
實志以存敬畏密操履爲實功而其極則以宰理人物成能
天地爲實用作講義一卷宋史與遼金二史舊分三書維騏
乃合之爲一以遼金附之而列二王於本紀褒貶去取義例

嚴整閱二十年而始成名之曰宋史新編又著史記考要續
莆陽文獻志及所作詩文集並行於世維騏登第五十載未
嘗一日服官中更倭亂故廬焚燬家困甚終不妄取世味無
所嗜惟嗜讀書撫按監司時有論薦迄不復起隆慶初廷臣
復薦所司以維騏年高但授承德郎致仕終於萬曆二年年
七十有八孫茂竹海陽知縣茂竹子祀副都御史巡撫山西
王慎中字道思晉江人四歲能誦詩十八舉嘉靖五年進士
授戶部主事尋改禮部祠祭司時四方名士唐順之陳東李
開先趙時春任瀚熊過屠應埈華察陸銓江以達曾忭輩咸
在部曹慎中與之講習學大進十二年詔簡部郎爲翰林衆
首擬慎中大學士張孚敬欲一見辭不赴乃稍移吏部爲考

功員外郎進驗封郎中忌者讒之孚敬因覆議直人張衍慶請封疏謫常州通判稍遷戶部主事禮部員外郎並在南京久之擢山東提學僉事改江西參議進河南參政侍郎王梟奉命賑荒以其事委愼中還朝薦愼中可重用會二十年大計吏部注愼中不及而大學士夏言先嘗爲禮部尚書愼中其屬吏也與相忤遂內批不謹落其職愼中爲文初主秦漢謂東京下無可取已悟歐曾作文之法乃盡焚舊作一意師倣尤得力於曾輩順之初不服久亦變而從之壯年廢業益肆力古文演迤詳贍卓然成家與順之齊名天下稱之曰王唐又曰晉江昆陵家居問業者踰至年五十一而終李攀龍王世貞後起力排之卒不能掩攀龍愼中提學山東時所賞

拔者也愼中初號遵巖居士後號南江應埈字文升平湖人刑部尚書勳子也舉嘉靖五年進士由郎中改翰林官至右諭德察字子潛無錫人應埈同年進士累官侍讀學士掌南京翰林院銓字選之鄞人嘉靖二年進士與弟編修武爭大禮並繫詔獄被杖後官廣西布政使武終山東提學副使兄弟皆能文以達字子順貴溪人嘉靖五年進士累官福建提學僉事

高叔嗣字子業祥符人年十六作申請賦幾萬言見者驚異十八舉於鄉第嘉靖二年進士授工部主事改吏部歷稽勳郎中出爲山西左參政斷疑獄十二事人稱爲神遷湖廣按察使卒官年三十有七叔嗣少受知邑人李夢陽及官吏部

與三原馬理武城王道同署以文藝相磨切其爲詩清新婉約雖爲夢陽所知不宗其說陳束序其蘇門集謂有應物之冲澹兼曲江之沈雄體王孟之清適具高岑之悲壯王世貞則曰子業詩如高山鼓琴沈思忽往木葉盡脫石氣自青又如衛洗馬言愁憔悴婉篤令人心折而蔡汝楠至推爲本朝第一云兄仲嗣官知府亦有才名於世汝楠字子木兒時隨父南京聽祭酒湛若水講學輒有解悟年十八成嘉靖十一年進士授行人從王愼中唐順之及叔嗣輩學爲詩尋進刑部員外郎徙南京刑部善皇甫洵兄弟尚書頌璘引爲忘年交廷議改歸德州爲府擢汝楠知其府事以母憂歸聚諸生石鼓書院與說經治民有惠政旣去士民祠祀之歷官江西左右布政使擢右副都御史巡撫河南召爲兵部右侍郎從諸大僚祝釐西宮世宗望見其貌寢改南京工部右侍郎未幾卒汝楠始好爲詩有重名中年好經學及官江西與鄒守益羅洪先游學益進然詩由此不工云

陳束字約之鄞人生而聰慧絕倫好讀古書會稽侍郎董玘官翰林時爲愛女擇壻束里人張邦奇爲言束才召視之束垂髻而前試詞賦立就遂字以女攜至京束遂有文譽嘉靖八年廷對世宗親擢羅洪先程文德楊名爲一甲而置唐順之及束任瀚於二甲皆手批其卷無何考庶吉士得胡經等二十人以束及順之瀚曾奉御批列經等首座主張璵霍韜以前此館選悉改他曹引嫌亦議改乃寢前命束授禮部主

事時有嘉靖八才子之稱謂東及王慎中唐順之趙時春熊過任瀚李開先呂高也四郊改建都御史汪鉉請徙近郊一二里內居民墳墓東疏諫不報遷員外郎改編修東出璵鞠門不肖親附歲時上壽望門投刺輒馳馬過之爲所惡出爲湖廣僉事分巡辰沅治有聲稍遷福建參議改河南提學副使東故有嘔血疾會科試期迫試八郡之士三月而畢疾增劇竟不起年纔三十有三妻董慧甚亦能詩東卒未幾亦卒東竟無後當嘉靖初稱詩者多宗何李東與順之輩厭而矯之東早世且藁多散逸今所傳后岡集僅十之一二云后岡東別號也開先字伯華章丘人東同年進士官至太常少卿性好蓄書李氏藏書之名聞天下高字山甫丹徒人亦東同

年進士歷官山東提學副使鄉試錄文舊多出學使者手巡按御史葉經遠乞順之文高心憾寓書京師友人言經紕繆嚴嵩惡經遂置之死及後大計諸御史謂經禍由高乃斥歸於八子中名最下

田汝成字叔禾錢塘人嘉靖五年進士授南京刑部主事尋召改禮部十年十二月上言陛下以青宮久虛祈天建醮復普放生之仁凡羈蹄鐵鬮禁在上林者咸獲縱釋顧使囹圄之徒久纏徽纆衣冠之侶流竄窮荒父子長離魂魄永喪此獨非陛下之赤子乎望大廣皇仁悉加寬宥忤旨切責停俸二月屢遷祠祭郎中廣東僉事謫知滁州復擢貴州僉事改廣西右參議分守右江龍州土酋趙楷憑祥州土酋李寰皆

弒主自立與副使翁萬達密討誅之努灘賊侯公丁為亂斷
藤峽羣賊與相應汝成復偕萬達設策誘擒公丁而進兵討
峽賊大破之又與萬達建善後七事一方遂靖有銀幣之賜
涖右江數年頗有兵事皆萬達尸謀而汝成贊決之其績甚
著尋遷福建提學副使歲當大比預定諸生甲乙比榜發一
如所定汝成博學工古文尤善敘述歷官西南諳曉先朝遺
事撰炎微紀聞歸田後盤桓湖山窮游浙西諸名勝撰西湖
游覽志竝見稱於時他所論著甚多時推其博洽子藝蘅字
子藝十歲從父過采石賦詩有警句性放誕不羈嗜酒任俠
以歲貢生為徽州訓導罷歸作詩有才調為人所稱
皇甫濬字子安長洲人父錄弘治九年進士任重慶知府生

四子冲濬汭濬冲汭同登嘉靖七年鄉薦明年汭第進士又
三年濬第進士又十三年濬亦第進士而冲尚為舉子兄弟
竝好學工詩稱皇甫四傑冲字子浚善騎射好談兵遇南北
內訌譔幾策兵統枕戈裸言三書凡數十萬言濬初授工部
主事改禮部歷儀制員外郎主客郎中在儀制時夏言為尚
書連疏請建儲皆濬起草故言深知濬才比簡宮僚遂用為
春坊司直兼翰林檢討言者論濬收官有私謫廣平通判量
移南京刑部主事進員外郎遷浙江僉事大計京官以南曹
事論罷邑邑發病卒濬沈靜寡與自負高峻稍不當意終日
相對無一言居官砥廉隅然頗操切多忤物故數被讒謗云
汭字子循七歲能詩官工部主事名動公卿沾沾自喜用是

貶秩爲黃州推官屢遷南京稽勲郎中再貶開州同知量移處州府同知擢雲南僉事以計典論黜沆和易近聲色好狹游不能通知戶外事於兄弟中最老壽年八十乃卒濂字子約初授工部主事母喪除起故官典惜薪廠賈人僞增數罔利濂杖而按其罪其女乃尚書文明妾明名濂切責之濂抗言曰公掌邦政縱奸人干紀又欲奪郎官法守邪明爲斂容謝大計謫河南布政司理問終興化同知濂兄弟與黃魯曾省曾爲中表兄弟文藻亦相似其後里人張鳳翼燕翼獻翼竝負才名吳人語曰前有四皇後有三張鳳翼燕翼終舉人而獻翼爲太學生名日益高年老矣狂甚爲讐家所殺王問字子裕無錫人受業同縣邵甯以學行稱嘉靖十七年

成進士授戶部主事改南京職方以父老便養請也遷車駕郎中擢廣東按察司僉事行至桐江徘徊不欲去策得甘節之卦賦詩十二章遂乞養歸父卒不復仕築室湖濱實界山讀書三十年不履城市清修雅尚數薦不起興至則爲詩文或行草數紙或點染花鳥不矜研削用自娛悅年八十乃卒子鑑字汝明嘉靖末年進士累官吏部稽勲郎中念父老謝病歸奉養父歿起尚寶卿改南京鴻臚卿引年乞休進太僕卿致仕

茅坤字順甫歸安人嘉靖十七年進士歷知青陽丹徒二縣母憂服闋遷禮部主事移吏部稽勲司坐累謫廣平通判屢遷廣西兵備僉事轄府江道坤雅好談兵猺賊據鬼子諸砦

殺陽朔令朝議大征總督應積以問坤坤曰大征非兵十萬不可餉稱之今猝不能集而賊已據險為備矣計莫若鵬勦倏入殲其魁他部必驚謀自全此便計也積善之悉以兵事委坤連破十七砦晉秩二等民立祠祀之遷大名兵備副使總督楊博歎為奇才特薦於朝為忌者所中追論其先任貪污狀落職歸時倭事方急胡宗憲延之幕中與籌兵事奏請為福建副使吏部持之乃已家人橫於里為巡按龐尚鵬所劾遂褫冠帶坤既廢用心計治生家大起年九十卒於萬曆二十九年坤善古文最心折唐順之順之喜唐宋諸大家文所著文編唐宋人自韓柳歐三蘇曾王八家外無所取故坤選八大家文鈔其書甚行海內鄉里小生無不知茅鹿門者

鹿門坤之別號也少子維字孝若能詩與同郡臧懋循吳稼澄吳夢暘並稱四子嘗謂闕上書希得召見陳當世大事不報

謝榛字茂秦臨清人眇一目年十六作樂府商調少年爭歌之已折節讀書刻意為歌詩西游彰德為趙康王所賓禮入京師脫盧柙於獄李攀龍王世貞輩結詩社榛為長攀龍次之及攀龍名大熾榛與論生平頗相鑄責攀龍遂貽書絕交世貞輩右攀龍力相排擠削其名於七子之列然榛游道日廣秦晉諸王爭延致大河南北皆稱謝榛先生趙康王卒榛乃歸萬曆元年冬復游彰德王曾孫穆王亦賓禮之酒闌樂止命所愛賈姬獨奏琵琶則榛所製竹枝詞也榛方傾聽王

命姬出拜光華射人藉地而坐竟十章榛曰此山人里言安足汚佳人玉齒請更製以備房中之奏詰朝上新詞十四闕姬悉按而譜之明年元旦便殿奏伎酒止送客卽盛禮而歸姬於榛榛載以游燕趙間至大名客請賦壽詩百章成八十八餘首投筆而逝當七子結社之始尚論有唐諸家茫無所從榛曰取李杜十四家最勝者熟讀之以會神氣歌詠之以求聲調玩味之以哀精華得此三要則浩乎渾淪不必塑謫仙而畫少陵也諸人心師其言厥後雖合力擯榛其稱詩指要實自榛發也

盧柟字少樾濬縣人家素封輸貲爲國學生博聞強記落筆數千言爲人跡弛好使酒罵座常爲具名邑今日晏不至柟

大怒徹席滅炬而臥令至柟已大醉不具賓主禮會柟役夫被榜他日牆壓死令卽捕柟論死繫獄破其家里中兒爲獄卒恨柟笞之數百謀以土囊壓殺之爲他卒救解柟居獄中益讀所攜書作幽鞠放招二賦詞旨沈鬱謝榛攜入京師見諸貴人泣訴其冤狀曰生有一盧柟不能救乃從千古哀沉而弔湘乎平湖陸光祖選得濬令因榛言平反其獄柟出走謁榛榛方客趙康王所王立名見柟禮爲上賓諸宗人以王故爭容柟柟酒酣罵座如故及光祖爲南京禮部郎柟往訪之因徧游吳會無所遇還益落魄嗜酒病三日卒柟騷賦最爲王世貞所稱詩亦豪放如其爲人

李攀龍字子鱗歷城人九歲而孤家貧自奮於學稍長爲諸

生與友人許邦才殿士僖學爲詩歌已益厭訓詁學日讀古書里人共目爲狂生舉嘉靖二十三年進士授刑部主事歷員外郎郎中稍遷順德知府有善政上官交薦擢陝西提學副使鄉人殷學爲巡撫檄令屬文攀龍怫然曰文可檄致邪拒不應會其地數震攀龍心悸念母思歸遂謝病故事外官謝病不再起吏部重其才用何景明例特予告歸予告者例得再起攀龍旣歸構白雪樓東眺華不注西挹鮑山曰他無所溷吾目也名日益高賓客造門率謝不見大吏至亦然以是得簡傲聲獨故交殷許輩過從靡聞時徐中行亦家居坐客恒滿二人聞之交相得也歸田將十年隆慶改元薦起浙江副使改左參政擢河南按察使攀龍至是摧亢爲和賓客

亦稍稍進無何奔母喪歸哀毀得疾疾少間一日心痛卒攀龍之始官刑曹也濮州李先芳臨清謝榛孝豐吳維岳輩方倡詩社往與焉王世貞初釋褐先芳引入社遂與攀龍定交明年先芳出爲外吏又二年宗臣梁有譽入是爲五子未幾徐中行吳國倫亦入乃改稱七子諸人多少年才高氣銳互相標榜視當世無人七才子之名播天下揆先芳維岳不與兩人恨次骨已而榛亦被擯攀龍遂爲之魁其持論謂文自西京詩自天寶而下俱無足觀於本朝獨推李夢陽諸子翕然和之非是則詆爲宋學攀龍才思勁鷲名最高獨心重世貞天下亦竝稱王李又與李夢陽何景明竝稱何李王李其爲詩務以聲調勝然辭意不能無重複所擬樂府至更古數

字爲已作文則聳牙戟口讀者至不能終篇好之者推爲一代宗匠亦多受世挾摘云自號涖澗有譽臣中行國倫皆嘉靖二十九年進士有譽除刑部主事旅食三年蕭然一室以念母告歸杜門讀書大吏至辭不見卒年三十六有譽善相人謂宗臣曰子甚貴而無年已自歎曰吾亦不久於世有譽死六年臣果卒亦三十有六臣字子相揚州興化人出刑部主事調考功謝病歸築室百花洲上讀書其中起故官移文選進稽勲員外郎嚴嵩惡之出爲福建參議倭薄城臣守西門納鄉人避難者萬人或言賊且迫曰我在不憂賊也與主者共擊退之尋遷提學副使卒官士民皆哭中行字子與長興人美姿容善飲酒由刑部主事歷員外郎郎中稍遷汀州

知府廣東賊譚五來犯禦之有功勞其且走俾武平令徐甫宰邀擊之讓功甫宰甫宰得優擢尋以父憂歸補汝寧坐大計貶長蘆鹽運判官遷湖廣僉事掩捕湖盜柯彩鳳得其積貯活飢民萬餘累官江西左右政使萬曆六年卒官僚屬相哭士民亦巷哭中行性好客無賢愚貴賤應之不倦故其死也人多哀之國倫字明卿興國人出中書舍人擢兵科給事中楊繼盛死倡衆賻送忤嚴嵩假他事謫江西按察司知事量移南康推官調歸德居二歲棄去嵩敗起建寧同知累遷河南左參政大計罷歸國倫才氣橫放好客輕財歸田後聲名籍甚求名之士不東走太倉則西走興國萬曆時世貞旣歿國倫猶無恙在七子中最爲老壽

王世貞字元美太倉人兵部侍郎倬孫右都御史忬子也生有異稟書過目終身弗忘十五咏寶刀老宿皆賞異舉嘉靖二十六年進士年方十九好爲詩古文及官刑部主事入王宗沐李先芳吳維岳等詩社諸人多外遷又與李攀龍宗臣梁有譽徐中行吳國倫輩紹述何李排擊王唐名日益盛屢遷員外郎郎中奸人閹姓者犯法錦衣都督陸炳匿諸家世貞搜得之炳介嚴嵩以請不許楊繼盛下吏時進湯藥其妻訟夫冤爲代草旣死復棺殮之嵩大恨吏部兩擬提學皆不用用爲青州兵備副使父忬以灤河失事嵩惡世貞構忬於帝論死繫獄世貞解官奔赴與弟世懋日蒲伏嵩門涕泣求貸嵩陰持忬獄而時爲謾語以寬之兩人又日囚服跽道旁

遮諸貴人輿搏頽乞救諸貴人畏嵩不敢言忬竟死西市兄弟哀號欲絕持喪歸皆蔬食三年不入內寢旣除服猶却冠帶苴履葛巾不赴宴會隆慶元年八月兄弟伏闕訟父冤言爲嵩所害大學士徐階左右之復忬官世貞意不欲出會詔求直言疏陳法祖宗正殿名廣恩義寬禁例修典章推德意昭爵賞練兵實八事以應詔無何吏部用言官薦令以副使泣大名猶不欲出攀龍等以大義曉之乃就官遷浙江右參政山西按察使母憂歸服除補湖廣旋改廣西右布政使入爲太僕卿萬曆二年九月以右副都御史撫治鄖陽數條奏屯田戍守兵食事宜咸切大計有奸僧僞稱樂平王次子奉高皇帝御容金牒行遊天下世貞曰宗藩不得出城而壽張

如此必偽也捕訊之果偽遂服辜張居正枋國以世貞同年生有意引之世貞不甚親附所部荊州地震引京房占謂臣道太盛坤維不寧用以諷居正居正婦弟辱江陵令世貞論奏不少貸居正積不能堪會遷南京大理卿爲給事中楊節所劾卽取旨罷之後起應天府尹復被劾罷居正歿起南京刑部右侍郎辭疾不赴久之所善王錫爵秉政起南京兵部皆正三世貞通理前俸得考滿蔭子北擢南京刑部尚書御史黃仁榮言世貞先被劾不當計俸據故事力爭世貞乃三疏移疾歸二十一年卒於家世貞始與李攀龍柳主文柄攀龍歿獨操其柄二十年才最高地望最顯聲華意氣籠蓋海

內舉天下士大夫以及山人詞客衲子羽流莫不奔走門下片言褒賞聲價驟起自來文人字隘名主風雅領袖人倫未有若世貞之盛者也其持論文必西漢詩必盛唐大曆以後書勿讀而藻飾太甚晚年攻者漸起世貞顧漸造平淡病亟時劉鳳往視見其手蘇子瞻集諷翫不置也世貞自號鳳洲又號弇州山人其所與遊者大抵見其集中前五子篇則攀龍中行有譽國倫臣也後五子篇則南昌余曰德蒲圻魏裳歙汪道昆銅梁張佳胤新蔡張九一也廣五子篇則崑山俞允文濬盧柟濮州李先芳孝豐吳維岳順德歐大任也續五子篇則陽曲王道行東明石星從化黎民表南昌朱多燧常熟趙用賢也末五子篇則京山李維楨鄞屠隆南樂魏允中

蘭谿胡應麟也而用賢復與焉又作八哀篇紀同郡中老輩
陸治彭年文嘉陳憲陸師道黃姬水顧聖之錢穀作四十詠
紀遠近交游皇甫汭莫如忠許邦才周天球沈明臣王祖嫡
劉鳳張鳳翼朱多熿顧孟林殷都穆文熙劉黃裳張獻翼王
穉登王叔承同弘禴沈思孝魏允貞喻均鄒迪光余翔張元
凱張鳴鳳邢侗鄒觀光曹昌先徐益孫瞿汝稷顧紹芳朱器
封黃廷綬徐桂王伯稠王衡汪道貫華善繼張九二梅鼎祚
吳稼登之屬然其所去取頗以好惡為高下曰德字德甫佳
眉字肖甫九一字助甫世貞詩所謂吾黨有三甫也裳字順
甫與曰德俱嘉靖二十九年進士曰德終福建副使裳終濟
南知府九一嘉靖三十二年進士終巡撫寧夏僉都御史佳

胤自有傳道昆字伯玉世貞同年進士大學士張居正亦其
同年生也父七十壽道昆文當其思居正亟稱之世貞乃緣
居正指筆之藝苑卮言曰文繁而有法者于鱗簡而有法者
伯玉也道昆由是名大起官兵部左侍郎世貞亦嘗貳兵
部天下稱兩司馬道昆晚號林居四方乞詩文者填戶靡不
應意而去然平日好大言詆蘇軾為不通世貞後自以道
道昆為過云應麟幼能詩萬曆中舉於鄉久不第築室山
中購書四萬餘卷手自編次多撰著攜詩謁世貞世貞喜
而激賞之歸益自負所著詩藪十卷大抵奉世貞卮言為
律令而敷衍其說謂千古之詩皆出於有明李何李王四家
之中牢籠千古總萃百家尤莫盛於世貞詩家之有世貞集

大成之尼父也其貢諛如此世貞弟世懋字敬美嘉靖三十八年成進士即遭父憂父雪始還南京禮部主事歷陝西福建提學副使再遷太常少卿先世貞三年卒好學善詩文名亞其兄世貞力推引之以為勝口琴龍道昆輩因稱為小美世貞子士驥字同伯舉鄉試第一登萬曆十七年進士終吏部員外郎亦能文

歸有光字熙甫崑山人九歲能屬文弱冠盡通五經三史諸書師事同邑魏校嘉靖十九年舉鄉試八上春官不第徙居嘉定安亭江上讀書談道學徒常數百人稱為震川先生四十四年始成進士授長興知縣用古教化為治每聽訟引婦女兒童案前刺刺作吳語斷訖遣去不具獄自以大儒即周

召為牧伯亦當優假大吏令不便輒寢閣不行有所擊斷直行已意大吏多惡之論調順德廵判專轄馬政明世進士為令無遷倖者名為遷實重抑之也隆慶四年大學士高拱趙貞吉雅知有光引為南京太僕寺留掌內閣制敕房修世宗實錄卒官有光為古文原本經書好太史公書得其神理時王世貞主盟文壇有光力相贊世貞目為妄庸巨子世貞大憾其後亦心折有光為之讚曰千古有公繼韓歐陽余豈異趨久而自傷其推重如此錢謙益云即其言以詆世貞然操觚家從此鮮實學而妄談歐曾亦不能無弊云有光少工舉子業與胡友信楊起元湯顯祖先後齊名世以配王鏊唐順之薛應旂瞿景淳所謂八大家也諸人各見傳中惟友信功名

不顯友信德清人隆慶二年進士順德知縣有治績卒官有光少子子慕字季思舉萬曆十九年鄉試再被放卽屏居江村讀書其中真無錫高攀龍最善歿巡按御史祁彪佳請於朝贈翰林待詔

何良俊字元朗松江華亭人王圻字元翰上海人良俊少篤學與弟良傳並負俊才良傳舉進士官南京禮部郎中而良俊猶滯場屋與上海張之象同里徐獻忠董宜陽並有聲良俊以嘉靖中歲貢生入國學當路知其名用蔡羽例特授南京翰林院孔目趙貞吉王維禎相繼掌院事與相得甚歡良俊居久之意不樂慨然歎曰吾有清森閣在海上藏書四萬卷名畫百籤古法帖鼎彝數十種乘此不居而僕僕牛馬走

乎遂移疾歸凡所纂輯咸爲世稱獻忠字伯臣嘉靖中舉於鄉官奉化知縣既歸著書數百卷宜陽字子元工詩文兼善古人書法之象字月麓由諸生入國學授浙江按察司知事以吏隱自命歸益務謨著晚居秀林山卒入城市三人者皆良俊所與友也圻舉嘉靖四十四年進士除清江知縣調萬安擢御史忤時相出爲福建按察僉事歷官陝西布政參議乞養歸築室淞江之濱種梅萬樹日梅花源杜門著述老而不倦有續文獻通考諸書行世初圻以奏議爲趙貞吉所推張居正與貞吉交惡諷圻攻之不應高拱爲圻座主時方修隙徐階又以爲私其鄉人不助已不能無志遂撫拾之竟以外僚終云

季本爲諸生有盛名總督胡宗憲招致幕府與歛余寅鄞人
沈明臣同筦書記宗憲得白鹿將獻諸朝令渭草表并他客
草寄所善學士擇其尤者上之學士以渭表進世宗大悅益
寵異宗憲宗憲以是益重渭宗憲嘗宴將吏於爛柯山酒酣
樂作明臣作饒歌十章中有云狹巷短兵相接處殺人如草
不聞聲宗憲起捋其鬚曰何物沈生雄快乃爾卽命刻於石
寵禮與渭埒督府勢嚴重將吏莫敢仰視渭角巾布衣長揖
縱談幕中有急需夜深開戟門以待渭或醉不至宗憲顧善
之寅明臣亦頗負崖岸以侃直見禮渭知兵好奇計宗憲擒
徐海誘王直皆預其謀藉宗憲勢頗橫及宗憲下獄渭懼禍

遂發狂引巨錐刺耳深數寸又以椎碎腎囊皆不死已又擊
殺繼妻論死繫獄里人張元怵力救得免乃游金陵抵宣遼
縱觀諸邊阨塞善李成梁諸子入京師主元怵元怵導以禮
法渭不能從久之怒而去後元怵卒白衣往弔撫棺慟哭不
告姓名去諸子追及哭而拜諸途渭天才超軼詩文絕出倫
輩善草書工寫花草竹石嘗自言吾書第一詩次之文次之
畫又次之當嘉靖時王李倡七子社謝榛以布衣被擯渭憤
其以軒冕壓羣布誓不入二人黨後二十年公安袁宏道游
越中得渭殘帙以示祭酒陶望齡相與激賞刻其集行世寅
字仲房明臣字嘉則皆有詩名

字中良即引字嘉興省自嘉靖

越中掛置焚神以示祭西國望儲財與越實際其集亦世定

其以神靈聖草亦皆不入二人黨外二十五年公矣矣矣矣

書又次之當嘉慶初王李出十千極極以命亦亦亦亦亦

筆善書工意非草竹以管自言吾書第一書次之文次之

昔我各去前于賦又哭而取前念即天木故神書文錄出命

去即不謂貧人之怒而此此此此此此此此此此此此此

蘇聯南藝列集善李如梁南江人京南王亦亦亦亦亦亦亦

外蘇妻備我藥熾甲人亦亦亦亦亦亦亦亦亦亦亦亦亦亦亦

明史彙

列傳第一百六十四

光祿大夫 經筵講官明史總裁戶部尚書加七級臣王鴻緒奉

敕編撰

文苑四

李維楨

王穉登俞允文 王叔承

屠隆

唐時升叟 程嘉燧

李流芳王志堅

焦竑

董其昌莫如忠 米萬鍾

邢侗

黃輝

袁宏道鍾惺 譚元春

郝敬

王惟儉

曹學佺

陳仁錫

艾南英章世純 羅萬藻

陳際泰

張溥張 采

曾異撰

李維楨字本寧京山人父裕福建布政使維楨舉隆慶二年

進士由庶吉士授編修萬曆時穆宗實錄成進修撰出為陝西右參議遷提學副使浮湛外僚幾三十年天啓初以布政使家居年七十餘矣會朝議登用者舊名為南京太僕卿旋改太常未赴聞諫官有言力辭不就時方修神宗實錄會以維楨擅史才且通籍五十餘年熟諳先朝政事宜領史局給事中薛大中特疏薦之未及用四年四月太常卿董其昌復薦之乃召為禮部右侍郎甫三月進尚書竝在南京維楨緣史事起用乃館中諸臣憚其以前輩歷已不令入館但超遷其官維楨亦以年衰明年正月力乞骸骨去又明年卒於家年八十崇禎時贈太子太保維楨弱冠登朝博聞強記與同館許國齊名館中為之語日記不得問老許做不得問小李

維楨性不能飲讀書之外泊然無所嗜為人樂易濶達賓客雜進有背負者窮而來歸遇之益厚其文章弘肆有才氣海內請求者無虛日能屈曲以副其所望碑版之文照耀四裔門下士招富人大賈受取金錢代為請乞亦應之無倦負重名垂四十年然文多率意應酬品格不能高也

王穉登字伯穀長洲人四歲能屬對六歲善擘窠大字十歲能詩長益駿發有盛名嘉靖末遊京師客大學士袁煒家煒試諸吉士紫牡丹詩不稱意命穉登為之有警句煒名數諸吉士曰君輩職文章能得王秀才一句耶將薦之朝不果未幾煒卒穉登往哭其墓隆慶初復遊京師徐階當國頗修憾於煒或勸穉登弗名袁公客不從刻燕市客越二集備書其

事吳中自文徵明後風雅無定屬穉登嘗及徵明門遙接其風主詞翰之席者三十餘年四方士道吳門者雖賈人窮子必踵門求見可其寸楮尺素然後去嘉隆萬曆間布衣山人以詩名者十數俞允文王叔承沈明臣輩尤爲世所稱然聲華烜赫穉登爲最申時行以元老里居特相推重王世貞與同郡友善顧不甚推之及世貞歿其仲子士驥坐事繫獄穉登爲傾身救援人以是重其風義萬曆中詔修國史大學士趙志臯輩薦穉登及其同邑魏學禮江都陸弼黃岡王一鳴有詔徵用未上而史局罷卒年七十餘子留字亦房亦以詩名允文字仲蔚崑山人也其父舉進士官大理評事允文年十三而孤十五爲馬鞍山賦援據該博長老異之邑人歸有

光以古文名允文與角立年未四十謝去諸生專力於詩文書法與王世貞善而不喜李攀龍詩其持論不苟同如此叔承字承父吳江人少孤治經生業以好古謝去貧賚婦家爲婦翁所逐不予一錢乃攜婦歸奉母貧益甚入都客大學士李春芳所性嗜酒飲可一石春芳有所誤述覓之往往臥酒樓欠伸弗肯應久之乃謝歸太倉王錫爵其布衣交也再召會有三王竝封之議叔承遺書數千言謂當引大義以去就力爭不當依違兩端負主恩幸物望錫爵得書歎服其詩極爲世貞兄弟所許卒於萬曆中

屠隆字長卿鄞人生有異才學詩於沈明臣落筆數千言立就族人大山里人張時徹方爲貴官共相延譽名大噪舉萬

曆五年進士除穎上知縣調繁青浦時招名士飲酒賦詩游九峰三泖以仙令自許然於吏事不廢士民皆愛戴之遷禮部主事西寧侯宋世恩兄事隆宴游甚歡刑部主事俞顯卿者險人也嘗爲隆所詆心恨之許隆與世恩淫縱詞連禮部尙書陳經邦隆等上疏自理并列顯卿挾仇誣陷狀所司乃兩黜之而停世恩俸半歲隆歸道青浦父老爲斂田千畝請徙居隆不許歡飲三日謝歸隆束髮名高睥睨一世壯年被放益縱詩酒好賓客然家故貧又不善治生益窘乃賣文爲活詩文率不經意一揮數紙嘗戲命兩人對案分拈二題各賦百韻咄嗟之間二草竝就又與人對奕口誦詩文命人書之書不逮誦也子婦沈氏天孫修撰懋學女也與隆女瑤瑟竝能詩隆有所作兩人輒和之天孫卒年二十一瑤瑟年二十七兩家兄弟合刻其詩曰留香草

唐時升字叔達嘉定人父欽訓與歸有光善故時升早登有光之門年未三十謝舉子業專意古學王世貞官南都延之邸舍與辨晰疑義時升自以出歸氏門不肖復稱王氏弟子及王錫爵枋國其子衡邀時升入都值塞上用兵逆斷其情形虛實將帥勝負無一爽者家貧好施予灌園藝蔬蕭然自得詩援筆成不加點竄文得有光之傳與里人婁堅程嘉燧竝稱曰練川三老卒於崇禎九年年八十有六堅字子柔幼好學其師友皆出有光門堅學有師承經明行修鄉里推爲大師貢於國學不仕而歸工書法詩亦清新四明謝三賓知

縣事合時升堅嘉燧及李流芳詩刻之曰嘉定四先生集流芳字長蘅萬曆三十四年舉於鄉工詩善書尤精繪事天啟初會試北上抵近郊聞警賦詩而返遂絕意進取嘉燧字孟陽休寧人僑居嘉定少學科舉業不成乃讀古書工詩善畫與通州顧養謙善友人勸詣之乃渡江寓古寺與酒人歡飲三日夜賦咏古五章不見養謙而返崇禎中常熟錢謙益以侍郎罷歸築耦耕堂邀嘉燧讀書其中閱十年返休寧遂卒年七十有九謙益最重其詩稱曰松圓詩老松圓者嘉燧所居處又崑山王志堅字弱生舉萬曆三十八年進士授南京兵部主事歷官僉事督湖廣學政卒官謙益序其詩曰志堅少與李流芳同學爲詩文法唐宋名家通籍後卜居吳門古

南園杜門却掃肆志讀書先經後史先史後子集其讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文爲五編考覈唐宋碑志援史傳摺雜說以參覈其事之同異文之純駁篇章甚富自定詩才七十餘首蓋許其矜慎得讀書法也

焦竑字弱侯江寧人爲諸生有盛名從督學御史耿定向學復質疑於羅汝芳舉嘉靖四十三年鄉試下第還定向遜十四郡名士讀書崇正書院以竑爲之長及定向里居復往從之萬曆十七年始以殿試第一人官翰林修撰益討習國朝典章二十二年大學士陳于陞建議修國史欲竑專領其事

竑遜謝乃先換經籍志其他率無所撰館亦竟罷翰林教小
內侍書者衆視爲具文竑獨曰此曹他日在帝左右安得忽
之取古奄人善惡時與論說皇長子出閣竑爲講官故事講
官進講罕有問者竑講畢徐曰博學審問功用維均敷陳或
未盡惟殿下賜明問皇長子稱善然無所質難也一日竑復
進曰殿下言不易發得毋諱其誤耶解則有誤問復何誤古
人不恥下問願以爲法皇長子復稱善亦竟無所問竑與同
列謀曰吾儕啓其端以便下問若何衆然之適講舜典竑舉
稽于衆舍已從人爲問皇長子曰稽者考也考集衆思然後
舍已之短從人之長又一日舉上帝降衷若有恒性皇長子
曰此無他卽天命之謂性也時方十三齡荅問無滯中外咸

知睿質之美亦由竑善啓迪也嘗講次羣鳥飛鳴皇長子仰
視竑輒肅立輟講皇長子斂容聽乃復講如初竑嘗爲養正
圖說採古儲君事可爲法戒者擬進之同官郭正域輩惡其
不相聞目爲賈譽竑遂止竑旣負重名性復疎直時事有不
可輒形之言論政府亦惡之張位尤甚二十五年主順天鄉
試舉子曹蕃等九人文多險誕語竑被劾謫福寧州同知歲
餘大計復鐫秩竑遂不出竑博極羣書自經史至稗官雜說
無不淹貫善爲古文典正馴雅卓然名家集名澹園竑所自
號也自未仕至家居無日不講學以汝芳爲宗而善定向兗
弟及李贄時頗以禪學譏之萬曆四十八年卒年八十熹宗
時以先朝講讀恩復官贈諭德賜祭廕子福王時追諡文端

子潤生見忠義傳

董其昌字元宰松江華亭人父漢儒有學行其昌初就塾比夜父從枕上授經悉能誦記舉萬曆十七年進士改庶吉士禮部侍郎田一儁以教習卒官其昌請假走數千里護其喪歸葬還授編修皇長子出閣充講官因事啓沃皇長子每目屬之坐失執政意出爲湖廣副使移疾歸起故官督湖廣學政不徇請囑爲勢家所怨嗾生儒數百人鼓譟毀其公署其昌卽拜疏求去帝不許而令所司按治其昌卒謝事歸起山東副使登萊兵備河南參政並不赴光宗立問舊講官董先生安在乃召爲太常少卿掌國子司業事天啓二年擢本寺卿兼侍讀學士時修神宗實錄命往南方採輯先朝章疏及

遺事其昌廣搜博徵錄成三百本又採留中之疏切於國本藩封人才風俗河渠食貨吏治邊防者別爲四十卷倣史贊之例每篇繫以筆斷書成表進有詔褒美宣付史館明年秋擢禮部右侍郎協理詹事府事尋轉左侍郎五年正月拜南京禮部尙書時政在奄豎黨禍酷烈其昌淡自引遠踰年請告歸崇禎四年起故官掌詹事府事居三年屢疏乞休詔加太子太保致仕又二年卒年八十有二贈太子太傅福王時謚文敏其昌天才俊逸少負重名在講席見知光宗爲僉人所忌其後魏瑞熏燎衣冠奄人請書翰者一切謝絕然不激不隨故得免於黨人之禍初華亭自沈度沈榮以後南安知府張弼詹事陸澂布政莫如忠及子是龍皆以善書稱其昌

後出超越諸家獨探神妙始以宋米芾爲宗後遂錯綜晉唐諸帖而變化之自成一家名聞外國其畫集宋元諸家之長行以己意瀟灑生動非人力所及也四方金石之刻得其制作手書以爲二絕造請無虛日尺素短札流布人間爭購寶之精於品題收藏家得片語隻字以爲重性和易通禪理蕭間吐納終日無俗語人儼之米芾趙孟頫云同時以善書名者臨邑邢侗順天米萬鍾晉江張瑞圖時人謂邢張米董又曰南董北米然三人者不逮其昌遠甚莫如忠字子良嘉靖十七年進士累官浙江布政使潔修自好夏言死經紀其喪善草書詩文有體要是龍字雲卿後以字行更字廷韓十歲能文長善書皇甫汭王世貞輩亟稱之以貢生終邢侗字子

愿萬曆二年進士終陝西行太僕卿家資鉅萬築來禽館於古犁丘減產奉客遂致中落妹慈靜善倣兄書米萬鍾字友石萬曆二十二年進士歷官江西按察使天啓五年魏忠賢黨倪文煥劾之遂削籍崇禎初起太僕少卿卒官張瑞圖者官至大學士逆案中人也

黃輝字平倩一字昭素南充人幼穎異父子元官湖廣御史屬訊疑獄輝檢律定讞如老吏御史聞而異之命負以至授錢穀集一覽輒記稍長博極羣書年十五舉鄉試第一登萬曆十七年進士改庶吉士館課文字多沿襲熟爛目爲翰林體及李攀龍王世貞之學行則又改而從之輝刻意學古一以韓歐爲師館閣文稍變時同館中詩文推陶望齡書畫推

董其昌輝詩及書與齊名至徵事輝十得八九焦竑以閎雅名亦自遜不如也由編修遷右中允充皇長子講官時帝寵鄭貴妃疎皇后長子長子生母王恭妃幾殆輝從內豎徵知其狀謂同里給事中王德完曰此國家大事旦夕不測書之史冊謂朝廷無人吾輩為萬世僇矣德完奮然屬輝具草土之下獄廷杖瀕死輝周旋橐篋不避險阻人或危之輝曰吾陷人於禍可坐視乎輝雅好禪學多方外交為言者所論時已為庶子掌司經局遂請告歸已起故官擢少詹事兼侍講學士卒官

袁宏道字中郎公安人與兄宗道弟中道並有才名時稱三袁宗道字伯修萬曆十四年會試第一授庶吉士進編修卒

官石庶子泰昌時追錄光宗講官贈禮部右侍郎宏道年十六為諸生即結社城南為之長間為詩歌古文有聲里中舉萬曆二十年進士歸家下帷讀書詩文主妙悟選吳縣知縣聽斷敏決公庭鮮事與士大夫談說詩文以風雅自命意有所不樂解官去徧遊吳越佳山水起授順天教授歷國子助教禮部主事謝病歸築園城南植柳萬株號曰柳浪與中道及一二老衲居焉久之起故官尋以清望擢吏部驗封主事改文選署司事故事選人掣簽時諸瑣事悉曹郎躬親之吏無敢近者一老吏排闥入自陳受人金欲與善地後又擅留姻戚之罷官者宏道憤縛送刑部置重辟都人大快尋移考功員外郎立歲終考察羣吏之法言外官三歲一察京官六

歲武官五歲此曹安得獨免疏上報可遂爲定制遷稽勳郎中後謝病歸數月卒中道字小修十餘歲作黃山雪二賦五千餘言長益豪邁從兩兄宦游京師多交四方名士足跡半天下萬曆三十一年始舉於鄉又十四年乃成進士由徽州教授歷國子博士南京禮部主事天啓四年進南京吏部郎中卒於官先是王李之學盛行袁氏兄弟獨心非之宗道在館中與同館黃輝力排其說於唐好白樂天於宋好蘇軾名其齋曰白蘇至宏道益矯以清新輕俊學者多舍王李而從之目爲公安體然戲謔嘲笑間雜俚語空疎者便之其後王李風漸熄而鍾譚之說大熾鍾譚者鍾惺譚友夏也中道憂之將昌言抨擊然時方競趨不能止有子曰祈年出後宏道

少有俊才舉於鄉早卒惺字伯敬景陵人萬曆三十八年進士授行人稍遷工部主事尋改南京禮部進郎中擢福建提學僉事以父憂歸卒於家惺貌寢羸不勝衣爲人嚴冷不喜接俗客由此得謝人事官南都儻秦淮水閣讀史恒至丙夜有所見卽筆之名曰史懷愛名山水所至必遊不極幽邃不止晚逃於禪以卒白宏道矯王李詩之弊倡以清真惺復矯其弊變而爲幽淡孤峭與同里譚元春評選唐人之詩爲唐詩歸又評選隋以前詩爲古詩歸鍾譚之名滿天下謂之景陵體然兩人學不甚富其識解多僻大爲通人所譏元春字友夏名輩後於惺以詩歸故與齊名至天啓七年始舉鄉試第一惺已前卒矣

郝敬字仲興京山人父承健舉於鄉官肅寧知縣敬幼稱神童性踈弛嘗殺人繫獄父友李維楨援出之館於家始折節讀書舉萬曆十七年進士歷知縉雲永嘉二縣有能聲徵授禮科給事中乞假歸養久之補戶科數有所論奏山東稅監陳增貪橫爲益都知縣吳宗堯所奏帝不罪敬上言開採不罷則陛下明旨不過爲愚弄臣民之虛文乞先停止然後以宗堯所奏下撫按勘覈止增不法之罪不聽頃之山東巡撫尹應元亦極論增罪帝怒切責應元斥宗堯爲民敬上言陛下處陳增一事甚失衆心自今宦豎之虐焰漲天忠臣之正氣掃地外廷之讜論絕響讒夫之利口橫生天下事莫知所底帝怒奪俸一年帝遣中官高案權稅京口暨祿權稅儀真

敬復力諫宗堯之劾增也增怒甚誣訐其賊私詞連青州一府官僚旁引商民吳時奉等請皆籍沒帝輒可之敬復力詆增乞速寢其奏亦不納爲要人所惡謫知江陰縣貪污不檢物論皆不予遂投劾歸杜門著書崇禎十二年卒

王惟儉字損仲祥谷人萬曆二十三年進士授濰縣知縣遷兵部職方主事三十年春遼東總兵官馬林以督稅使高淮被逮兵部尙書田樂等救之帝怒責職方不推代者空司而逐惟儉亦削籍歸家居二十年光宗立起光祿丞三遷大理少卿天啓三年八月擢右僉都御史巡撫山東值徐鴻儒之亂民多逃亡遼人避難來者亦多失所惟儉加意綏輯五年三月擢南京兵部右侍郎未赴入爲工部右侍郎魏忠賢黨

御史田景新劾之落職閒住惟儉資敏嗜學初被廢肆力經史百家苦宋史繁蕪手加刪定自為一書好書畫古玩典衣舉息務求必得萬曆天啓間世所推博物君子惟儉與董其昌並而嘉興李日華亞之日華字君實嘉興人萬曆二十年進士官至太僕少卿恬澹和易與物無忤惟儉則口多微詞好抨擊道學人不能堪嘗與時輩讌集徵漢書一事具悉末指其腹笑曰名下寧有虛士乎其自喜如此

曹學佺字能始侯官人弱冠舉萬曆二十三年進士授戶部主事中察典調南京添注大理左寺正居宥散七年肆力於學累遷南京戶部郎中四川右參政按察使蜀府燬於火估修資七十萬金學佺以宗藩條例却之又中察典議調天啓

二年起廣西右參議初槌擊獄興劉廷元輩主瘋癲學佺著野史紀略直書事本末至六年秋學佺遷陝西副使未行而廷元附魏忠賢大幸乃劾學佺私撰野史淆亂國章遂削籍燬所鐫板巡按御史王政新以嘗薦學佺亦勒閒住廣西大吏揣學佺必得重禍羈留以待已知忠賢無意殺之乃得釋還崇禎初起廣西副使力辭不就家居四十年著書所居石倉園中為石倉十二代詩選盛行於世嘗謂二氏有藏吾儒何獨無欲修儒藏與鼎立采顯四庫書因類分輯十有餘年功未及竣兩京繼覆唐王立於閩中起授太常卿尋遷禮部右侍郎兼侍講學士進尚書加太子太保及事敗走入山中投繯而死年七十有四詩文甚富總名石倉集閩中文風明

初爲盛至萬曆中再盛自學佗倡之

陳仁錫字明卿長洲人父允堅進士歷知諸暨崇德二縣仁錫年十九舉萬曆二十五年鄉試聞武進錢一本善易往師之得其指要久不第益究心經史之學多所論著天啓二年以殿試第三人授翰林編修時第一爲文震孟亦老成宿學海內咸慶得人明年丁內艱廬墓次服闋起故官尋直經筵典誥勅魏忠賢旨邊功矯旨錫上公爵給世券仁錫當視草持不可其黨以威劫之毅然曰世自有視草者何必我忠賢聞之怒不數日里人孫文豸以誦步天歌見捕坐妖言鍛鍊成獄詞連仁錫及震孟罪將不測有密救者得削籍歸崇禎改元召復故官旋進右中允署國子司業事再直經筵每進講多指陳時弊以預修神光二朝實錄進右諭德乞假歸越三年卽家起南京國子祭酒甫拜命得疾卒福王時贈詹事謚文莊仁錫講求經濟有志天下事性好學喜著書一時館閣中博洽者鮮其儔云

艾南英字千子東鄉人七歲作竹林七賢論長爲諸生好學無所不窺萬曆末場屋文腐爛南英淡疾之與同郡章世純羅萬藻陳際泰以興起斯文爲任乃刻四人所作行之世世人翕然歸之稱爲章羅陳艾天啓四年南英始舉於鄉座主檢討丁乾學給事中郝士膏發策詆魏忠賢南英對策亦有譏刺語忠賢怒削考官籍南英亦停三科居四年莊烈帝卽位詔許會試久之卒不第而文日有名負氣凌物人多畏而

惡之素所交亦多憚其口始王李之學大行天下談古文者悉宗之後鍾譚出而一變至是錢謙益負重名於詞林痛相糾駁南英和之於下排詆王李不遺餘力兩京繼覆江西郡縣盡失南英乃入閩唐王召見陳十可憂疏授兵部主事尋改御史明年八月卒於延平世純字大力臨川人博聞強記舉天啓元年鄉試崇禎中累官柳州知府年已七十矣聞京師變悲憤遺疾卒萬藻字文止世純同縣人天啓七年舉於鄉崇禎中行保舉法祭酒倪元璐以萬藻應詔辭不就福王時爲上杭知縣唐王立於閩擢禮部主事南英卒哭而殯之居數月亦卒際泰字大士亦臨川人父流寓汀州武平生於其地家貧不能從師又無書時取劬舍兒書屏人竊誦從外兄所獲書經四角已漫滅且無句讀自以意識別之遂通其義十歲於外家藥籠中見詩經取而疾走父見之怒督往田則攜至田所踞高阜而哦遂畢身不忘久之返臨川與南英輩以時文名天下其爲文敏甚一日可二三十首先後所作至萬首經生舉業之富無若際泰者崇禎三年舉於鄉又四年成進士年六十有八矣又三年除行人居四年護故相蔡國用喪南行卒於道

張溥字天如太倉人伯父輔之南京工部尙書溥幼嗜學所讀書必手鈔鈔已朗誦一過卽焚之又鈔如是者六七始已右手握管處指掌成繭數日輒割去冬月手皸日沃湯數次後名讀書之齋曰七錄以此也爲諸生招同里張采共學益

肆力經史名籍甚號婁東一。張崇禎元年以選貢生入都。采方成進士兩人名徹都下巴。而采官臨川。溥歸集郡中名士相與復古學名其文社曰復社。四年成進士。改庶吉士。以葬親乞假歸讀書。若經生無間寒暑。四方噉名者爭走其門。盡名爲復社。溥亦傾身結納。交游日廣。聲氣通朝右。所品題甲乙頗能爲榮辱。大吏多承其聲。欵諸奔走。附麗者輒自矜曰。吾以嗣東林也。執政大僚由此惡之。里人陸文聲者。輸貲爲監生。求入社不許。采又嘗以事扶之。文聲詣闕言風俗之弊。皆原於士子。溥采爲主盟。倡復社亂天下。溫體仁方枋國下其事於提學御史倪元珙。元珙移兵備參議馮元颺。元颺下太倉知州周仲璉。遷延久之。言復社無可罪。三人皆貶斥嚴。

旨窮究不已。閩人周之夔者嘗爲蘇州推官。坐事罷去。疑溥爲之恨甚。聞文聲訐溥。遂伏闕言。溥等把持計典已罷職實其所爲。因及復社恣橫狀。章下巡撫張國維等言之。夔去官。預溥事亦被旨譙讓。至十四年溥已卒。而事猶未竟。刑部尚郎蔡奕琛坐黨薛國觀繫獄。未知溥卒也。計溥遙握朝柄已罪。由溥因言采結黨亂政。詔責溥采。回奏采上言復社非臣事。然臣與溥生平相淬。瀕死避網羅。負義圖全。誼不出此。念溥日夜解經論文。矢心報稱。曾未一日服官。懷忠入地。卽今嚴論之下。并不得泣血自明。良足哀悼。當是時體仁已前罷繼者張至發。薛國觀皆不喜東林。故所司不敢覆奏。及是至發國觀亦相繼罷。而周延儒當國。溥座主也。其獲再相溥。

有力焉故采疏上事卽得解明年御史劉熙祚給事中姜琛
交章言溥砥行博聞所纂述經史有功聖學宜取備乙夜觀
因爲采學行帝御講筵問及二人延儒對曰讀書好秀才帝
曰溥已卒采小臣言官何爲薦之延儒曰二人好讀書能文
章言官爲舉子時讀其文又以其用未竟故惜之耳帝曰亦
未免偏延儒言誠如聖諭溥與黃道周皆偏因善讀書以故
惜之者衆帝領之遂有詔徵溥遺書而道周亦復官有司先
後錄上三千餘卷帝悉留覽溥詩文敏捷四方徵索者率不
起草對客揮毫俄頃立就以故名高一時卒時年止四十采
字受先與溥善溥性寬泛交博愛采特嚴毅喜甄別可否人
有過嘗面叱之知臨川摧強扶弱聲大起移疾歸士民泣送

載道知州劉士斗錢肅樂嚴重之以奸蠹詢采片紙報咸置
之法福王時起禮部主事進員外郎乞假去南都失守奸人
素銜采者羣擊之死復用大錐亂刺之已而甦避之鄰邑又

三年卒

曾異撰字弗人晉江人家侯官父爲諸生早卒母張氏以遺
腹生家窶甚紡績給晨夕異撰起孤童事母至孝歲饑採薯
葉雜糠粃食之母妻嘗負畚鋤乾草給爨然性介甚長吏知
其賢欲爲地不屑也久爲諸生見天下多故究心經世學其
所言皆可見之行事詩有奇氣然太近詭吳興潘曾紘督學
政上其母節行獲旌於朝及曾紘巡撫南贛得王惟儉所撰
宋史招異撰及新建徐世溥更定未成而罷崇禎十二年舉

鄉試年四十有九矣再赴會試還遂卒

其資... 葉蘇蘇... 則坐... 會與... 三... 卒

素尚... 之... 婦... 夫... 人

明史藁

列傳第一百六十五

光祿大夫

經筵講官明史總裁戶部尚書加七級臣王鴻緒奉

敕編撰

忠義一

花雲

許

瑗

王愷

孫炎

牟魯

王綱

王禕

吳

雲

熊鼎

易紹宗

琴彭

皇甫斌

張瑛

葉禎

王禎

萬琛

楊忠

吳景

王馮

源傑

霍恩

王郁

采佐

孔環

孫燧

許達

黃宏

宋以方

自古忠臣義士爲國捐生節炳一時名垂百世孔子云殺身以成仁司馬遷云死或重於泰山是以歷代史編凡盡忠所事之死靡他者備極表章尚已太祖勅業江左褒余闕福壽比及踐位感蔡子英之書聽使北去依其故主至從龍將士功未就而身亾若豫章康郎山兩廟及雞籠山功臣廟所祀諸人莫不爵贈公侯血食俎豆侑享太廟恤錄子孫以故不數十年靖難師起交爭在於本家大物未嘗易姓而羣臣不憚膏鼎鑊赤姻族以相抗拒也仁宣以後重熙累洽世履太平垂二百餘載中間交趾之征土木之變宸濠之叛以暨神熹兩朝邊陲多故湛身殉難者未易更僕數亦莫不備荷恤

忠之典若後人自陳請而所司失奏者輒嚴旨譙讓故節烈之蹟咸得顯暴於世至莊烈承基運丁陽九生靈塗炭國祚淪胥其時內外諸臣或隕首封疆或致命闕下駢肩接踵蹈死如歸固由忠義性生抑豈非累朝養士之報歟今博采蒐蒐都爲八卷其事實繁多及國家興亾所繫或連屬他人本末始明與夫忠諫而死疏草傳誦人口者皆已具前帙若抒忠勝國抗命

興朝稽諸前史例得并書而我

太宗文皇帝寬獎張春不奪其志厲節勸忠道光日月蓋洛邑頑民商家義士厥旨兩行原無或悖云

花雲懷遠人貌偉而黑驍勇絕倫至正十三年從太祖臨濠

克懷遠擒其帥拔全椒襲繆家寨太祖將取滁州率數騎猝
遇賊數千雲衛太祖突陣出遂克滁州從取和州獲卒三百
授管勾太祖渡江雲先濟既克太平命宿衛左右從克集慶
獲卒三千擢總管徇下丹陽丹徒金壇過馬馱沙道遇劇賊
擒殺甚衆授前部先鋒從拔常州守牛塘營擢行樞密院判
階安遠大將軍克常熟州獲卒萬餘已命趨寧國道殺羣盜
數百還守太平二十年閏五月陳友諒以舟師來寇雲與知
府許瑗院判王鼎元帥朱文遜率三千人禦之文遜戰死友
諒攻三日不克乃以巨舟乘漲令士卒緣舟尾攀堞登城遂
陷縛雲急雲怒大呼縛盡裂起奪守者刀殺五六人大罵賊
怒碎其首縛於舟檣叢射之而死瑗鼎亦抗罵死太祖卽吳

王位追封雲東丘郡侯瑗高陽郡侯鼎太原郡侯立忠臣祠
並祀之方戰急雲妻郜祭家廟挈三歲兒泣語家人曰城破
吾夫必死吾義不獨存然不可使花氏無後若輩善撫育之
雲被執郜赴水死侍兒孫痊畢抱兒行被掠至九江軍中惡
兒啼孫氏夜投漁家脫簪珥屬養之及漢兵敗孫往漁家竊
兒走夜宿陶穴中天明渡江潰軍奪舟去棄江中浮斷木入
葦洲採蓮實哺兒七日不死夜半有老父號雷老挈之行踰
年達太祖所孫抱兒拜泣太祖亦泣寘兒膝上曰將種也賜
雷老衣忽不見兒尋賜名煒累官水軍左衛指揮僉事世宗
卽位之歲其五世孫爲遼復州衛指揮請於朝贈郜貞烈夫
人孫安人立祠致祭文遜太祖養子也嘗與元帥秦友諒攻

克無爲州瑗字栗夫樂平人元末兩舉鄉第一會試不第放浪吳越間太祖駐婺州瑗謁曰元祚將終四方鼎沸足下欲定天下非延攬英雄難以成功太祖喜寘幕中參軍事未幾命守太平鼎儀真人初爲趙忠養子忠從太祖爲總管克太平授行樞密院判鎮池州趙普勝來寇忠陣歿命鼎嗣職復故姓守太平至是三人皆被難時有劉齊者以江西行省參政守吉安守將李明道召友諒兵至開西門納之殺參政曾萬中陳海執齊及知府宋叔華脅之降二人不屈又攻破臨安執同知趙天麟亦不屈俱送友諒所友諒方攻洪都殺三人徇城下友諒兵陷無爲州執知州董曾亦抗罵不屈沈之江

王愷字用和當塗人通經史元時爲府吏太祖拔太平召愷爲掾從下京口撫定新附民及建中書省用爲都事杭州苗軍數萬降待命嚴州境愷馳諭之偕其帥至太祖克婺州置中書分省調愷都事克衢州命總制軍民事置游擊軍籍丁壯萬餘常遇春守金華部將擾民愷執撻之遇春讓愷愷曰民者國之本撻一部將萬民安將軍所樂聞也遇春乃謝愷開化馬竄江山楊明並爲亂先後討禽之陳友諒寇龍江太祖命胡大海擣廣信以牽制之大海遣元帥葛俊往愷曰廣信漢門戶必重兵守備師撻之設挫衄吾衢繹騷矣大海乃自行至而廣信潰一如愷言尋遷左右司郎中佐大海治省事苗軍作亂害大海執愷欲降之愷正色曰吾守土義當死

寧從賊耶賊帥劉震欲全愷其黨吳得直曰無自貽患遂并其子行殺之愷善謀斷嘗白事未聽却立戶外抵暮不去太祖出怪問之愷諫如初卒從其議後贈奉直大夫飛騎尉追封當塗縣男

孫炎字伯融句容人面鐵色跛一足談辨風生雅負經濟與丁復夏煜游有詩名太祖下集慶召見陳元運將盡請延攬賢豪太祖方建行中書省用為首掾從征浙東擢池州同知尋進知府召為行省都事克處州授總制以禮招聘劉基章溢葉琛等基不肯出炎使再往基遺以寶劍炎作詩贈基言劍當獻天子斬不順命者非人臣所宜用封還之且貽書數千言基始就見會太祖來聘遂送詣建康是時城外皆賊壘

城空無一兵苗軍作亂殺院判耿再成執炎及知府王道同元帥朱文剛幽空室脅降皆不屈賊帥賀仁德饋雁酒炎大罵賊怒拔刀叱解衣炎曰此紫綺裘主上所賜吾當服以死遂與道同文剛皆見害年僅三十餘追贈丹陽縣男塑像再成祠道同由中書省宣使遷帳前總管出為義烏知縣擢知處州贈太原郡侯文剛太祖養子小字柴舍變起欲與再成聚兵殺賊不及遂被難贈鎮國將軍附祭功臣廟

牛魯烏程人為莒州同知洪武三年秋青州民孫古朴等為亂襲州城執魯欲降之魯曉之曰國家混一海宇民皆樂業若輩悔過自新可轉禍為福不然官軍旦夕至無遺種矣我守土臣義唯死所惜者良民耳賊未敢害擁至城南鄒家

莊魯大罵遂殺之已而賊破詔恤其家又有白謙裴源朱顯忠王名善黃里顧師勝陳敬吳得之屬謙婺源知州信州盜蕭明來寇謙力不能禦懷印出北門赴水死源肇慶府經歷以公事赴新興遇山賊陳勇卿被執勒令跪源大罵曰我命官乃跪賊即遂被殺洪武三年贈官二等顯忠如臯人爲張士誠將來降數從征有功以濠梁衛指揮僉事從鄧愈下河州抵土蕃從傅友德克文州遂留守之洪武四年夏蜀將丁世直召番數萬來攻却而復至食盡無援或勸走避叱不聽攻益急裹創力戰城破爲亂兵所殺千戶王均諒被執不屈磔死友德至世直乃走事聞贈恤有差名善義烏人爲高州通判海寇何均善被戮洪武五年其黨羅子仁率衆潛入城

執名善不屈死里雲內州同知洪武五年秋蒙古兵突入城里率兵巷戰力屈死之師勝興化人爲義眉知縣洪武十二年率民兵討賊彭普貴戰死賜勅褒美恤其家敬增城人洪武十四年舉賢良擢禮部郎中左遷雲南曲靖府經歷署劍川州事隣寇來攻城敬禦之官兵寡其下欲退敬瞋目大呼力戰死命恤其家得全椒人洪武中爲龍里守禦所千戶三十年古州上婆洞蠻林寬作亂攻城得與鎮守盱眙井孚乞兵貴州都司堅守以待賊燒門急攻得孚開門奮擊得中毒弩死孚戰死贈得指揮僉事孚正千戶子孫世襲恤其家

王綱字性常餘姚人與弟秉常敬常並以文學名綱善劉基語之曰老夫樂山林異時得志勿以世緣累我後基竟薦綱

於太祖洪武四年徵至京師年七十矣齒髮如少壯太祖異之策以治道擢兵部郎潮民弗靖除廣東參議督兵餉語所親曰吾命盡此矣以書訣家人攜子彥達行軍舸諭降諸亂民還抵增城遇海寇曹真截舟羅拜願得爲帥綱諭以禍福不從則奮罵賊昇之去爲壇坐綱日拜請綱罵不絕口遇害彥達年十六亦罵賊求死賊欲并殺之其酋曰父忠子孝殺之不祥令綴羊革裹父屍而出二十四年御史郭純以聞詔立廟死所歲時祀之彥達以父廕當得官痛父終身不仕王禕字子充義烏人幼敏慧長師黃潛學古文遂以文章名世嘗游元都陳時務七八千言宰相格不以聞危素張起巖輩先後論薦之不報乃南歸益著書名日盛太祖取婺州召

見用爲中書分省掾史征江西禕獻頌太祖喜曰江南有二儒卿與朱濂耳學問之博卿不如濂才思之雄濂不如卿賜而遣之太祖創禮賢館李文忠薦禕及許元王天錫召宣館中旋授江南儒學提舉司校理父憂歸服闋除侍禮郎兼引進使等掌起居注已命同知南康府事賜金帶籠之居官有惠政太祖將卽大位召還議禮坐事忤旨出爲漳州府通判洪武元年八月上疏言祈天永命之要在忠厚以存心寬大以爲政法天道順人心雷霆霜雪可暫不可常浙西旣平科斂當減太祖嘉納之然不能盡從也明年修元史命禕與濂爲總裁書成擢翰林待制同知制誥兼國史院編修官奉詔預教大本堂每召對必賜坐久則賜食坐失朝降編修出使

吐蕃未至召還五年正月太祖既平蜀議招諭雲南會北平
送雲南使者蘇成至乃元梁王把匝刺瓦爾密遣往漠北者
即命禕齎詔偕往至則諭王以禍福王未決而元嗣君遣使
脫脫微餉脅王以危言必欲殺禕王匿禕民間脫脫謂讓王
王不得已出禕見之脫脫欲屈禕禕叱曰天既訖汝元命我
朝實代之汝燭火餘燼敢與日月爭明耶且我與汝皆使也
豈為汝屈脫脫益詈王或曰兩國交兵使在其間不從則遣
之且王公素負重名不可害脫脫攘臂曰今雖孔聖義不得
存禕頷王曰汝殺我天兵夕至汝禍不旋踵矣遂遇害時十
二月二十四日也年五十有二梁王遣使致祭具棺衾斂之
八年九月太祖議再造使招諭梁王召湖廣行省參政吳雲

語之曰今天下一家獨雲南未奉正朔殺我使臣卿能為我
作陸賈斬雲頓首請行時梁王遣鐵知院輩二十餘人使漠
北為大軍所獲送京師太祖釋之令與雲偕行既入境鐵知
院等謀囚雲輩奉使被執罪且死乃誘雲令詐為元使改制
書共給梁王雲誓死不從鐵知院等遂殺雲梁王聞其事收
雲骨送蜀給孤寺殯之雲宜興人元翰林待制仕太祖歷官
刑部尚書與禮部尚書陶凱並出為湖廣參政雲南平雲子
黻上雲事於朝詔馳傳返葬以黻為國子生建文中禕子紳
訟禕事詔贈翰林學士諡文節正統中改諡忠文成化中命
建祠雲南春秋奉祀弘治中贈雲刑部尚書諡忠節與禕並
祠改祠額曰二忠紳字仲縉禕死時年十三鞠於兒殺事母

兄盡孝友長博學受業宋濂濂器之曰吾友不亾矣蜀獻王聘紳待以客禮紳啟王往雲南求父遺骸不獲卽死所致祭述滇南慟哭記以歸建文帝時用薦召爲國子博士預修太祖實錄獻大明饒歌鼓吹曲十二章與方孝孺友善卒官子徐字叔豐幼師孝孺孝孺被難與其友鄭珣輩潛收遺骸禍幾不測自是絕意仕進初紳痛父亾食不兼味徐守之不變居喪不飲酒食肉者三年卒門人私謚曰孝莊先生子汶字允達舉成化十四年進士授中書舍人居三年謝病歸讀書齊山下弘治初言者交薦與檢討陳獻章同名未抵京卒熊鼎字伯穎臨川人元末舉於鄉長龍溪書院兵亂結鄉人白字陳友諒屢脅之不應鄧愈鎮江西數延見奇其才太祖

至愈以鼎薦欲官之以親老辭乃留愈幕府贊軍事母喪除召至京師命偕諸儒撰公子書訓貴戚子弟尋授德清縣丞松江民錢鶴臯反鄰郡大驚鼎鎮之以靜吳元年召議禮儀除中書考功博士遷起居注宮殿成命類編古人行事可爲鑒戒者書壁間舍人耿忠使廣信還奏郡縣官違法狀帝遣御史廉之而時已頒赦書丞相李善長再諫不納鼎偕給事中尹正進曰朝廷布大信於四方復以細故煩御史失信且褻威帝默然久之乃不遣御史洪武改元新設浙江按察司以鼎爲僉事分部台溫台溫自方氏竊據僞官悍將二百人暴橫甚鼎盡遷之江淮間民始安尋奏治溫之倡邪教者散其衆爲農平陽知州梅謚坐贓辨不巳民數百咸訴知州無

罪鼎將聽之吏白鼎釋知州如故出何鼎歎曰法以誅罪吾
敢畏譴誅無罪人乎釋謚以情聞報如其奏寧海民陳德仲
支解黎異異妻屢訴不得直鼎一日覽牒有青蛙立案上鼎
曰蛙非黎異乎果異止勿動蛙果勿動乃逮德仲鞫實立正
其罪是秋山東初定設按察司復以鼎為僉事奏罷不職有
司數十輩列郡肅清進副使徙晉王府右傅坐累左遷大同
衛知事復授晉王府參軍召為刑部主事八年西部朵兒只
班率部落內附改鼎岐寧衛經歷賜白金寶鈔以行既至知
寇乃偽降密疏論之帝遣使慰勞賜以裘帽復遣中使趙成
召鼎鼎等既行寇果叛遣其下脅鼎鼎責以大義罵之遂
與成及知事杜寅俱被殺帝聞悼惜命葬之黃羊川立祠致
祭以所食俸米給其家

易紹宗攸縣人洪武時從軍北伐有功授象山縣錢倉所千
戶建文三年倭登岸剽掠紹宗大書於壁曰設將禦敵設軍
衛民縱敵不忠棄民不仁不忠不仁何以為臣為臣不職何
以為人書畢命妻李具牲酒生奠之訣而出密令游兵間道
焚賊舟賊驚救紹宗格戰殺賊多追至海岸陷淖中手刃數
十賊遂死其妻攜孤奏於朝賜葬祭勒碑旌之

琴彭交阯人永樂中以父安知府署茶籠州事有善政宣德
元年黎利反率眾圍其城彭拒守七月糧盡卒疲諸將無援
者巡按御史飛章請救宣宗馳勅責榮昌伯陳智等曰若等
奏黎利就撫俟涼秋之清化知府任今已秋矣利果赴官否

茶籠守彭被困孤城矢死無貳若等不援將何以逃責急發兵解圍無干國憲勅未至而城陷彭竟死之詔贈交趾左布政使遣使諭祭厚恤其家送一子京師官之時交趾人陳汝石陶季容陳汀亦皆以忠節著汝石初爲陳氏小校大軍南征率先歸附積功至都指揮僉事永樂十七年四忙土官車綿子等叛汝石從方政討之深入賊陣中流矢墜馬與千戶朱多蒲皆死多蒲亦交趾人事聞遣行人賜祭賻其家米布官爲置塚季容世爲水尾縣土官王師下交趾以爲水尾知縣用破賊功進歸化知州久之遷宣化府同知守北閑堡宣德元年遣所部阮執先等追賊至清波縣爲所獲旣而遣還令與縣丞黃拾珠招季容拾珠等脅以兵不爲動宣宗聞之

卽擢宣化知府壘書嘉勞賊復遣人誘季容季容執送沐晟而導官軍至水尾與賊將阮午等戰敗之會王通棄交趾季容義不從賊乃率官屬入朝汀古雷縣千夫長數從方政擊賊有功政信任之王通棄地汀憤恨北行爲賊所得賊壯之授以官令守交州東關汀誓不臣賊孳其家九十餘人從間道走賊追之家屬盡陷惟汀得入欽州帝嘉其義以爲指揮僉事厚賚之他若土官阮世寧七源州土官阮公庭亦皆不願從利率所部來歸乞居龍州凍州之地帝命加意撫恤資糧器用皆官給之

皇甫斌壽州人先爲興州右屯衛指揮同知都指揮巫凱薦其才調遼海衛忠勇有智略遇警輒身先士卒宣德五年十

月勒兵禦寇至密城東峪自旦及晡力戰矢盡援絕子弼以身衛父俱戰死千戶吳貴百戶吳襄毛觀並驍勇出必衝鋒至是皆死斌等雖死殺傷過當寇亦引退事聞詔有司褒恤張瑛字彥華浙江建德人永樂中舉於鄉入國學除刑部主事進員外郎正統時擢建寧知府鄧茂七作亂瑛爲守禦計甚備賊二千餘迫城結砦四出剽掠瑛率建安典史鄭烈會都指揮徐信軍分三路乘霧襲之斬首五百餘遂拔其砦進右參政仍知府事烈亦遷主簿茂七既誅其黨林拾得等轉掠城下瑛與從父敬禦之賊敗乘勝逐北陷伏中敬死瑛被執大罵不屈死詔贈福建按察使賜祭官其子熙羅田主簿弘治中建寧知府劉瑛請於朝立祠致祭時泉州守熊尚初

亦以拒賊被執死尚初南昌人初爲吏以才擢都察院都事進經歷正統中用都御史陳鑑薦遷泉州知府盜起上官檄尚初監軍不旬日降賊數百已而賊逼城下守將不敢禦尚初憤提民兵數百與晉江主簿史孟常陰陽訓術楊仕弘分統之拒於古陵坡兵敗皆遇害郡人哀之爲配享忠臣廟葉禎字夢吉高要人舉於鄉授潯州府同知補鳳翔調慶遠兩廣福賊蠱起列郡咸被害將吏率縮胸觀望禎誓不與賊俱生募健兒日訓練峒酋韋父強數敗官軍禎生繫之奪還子女畜產無算其黨忿悉衆攻城旗山守將擁兵不救禎出戰賊却去旋躡禎戰相當禎子公榮殲焉頃之賊圍雞刺諸村禎率三百人趨赴道遇賊人頭山下鏖戰禎被數鎗手刃

賊一人與從子宮慶及三百人皆死時天順三年正月晦也嶺南素無雪是夜大雷電雪深尺許賊釋圍去諸村獲全贈朝列大夫廣西參議立廟祀之

王禎字維禎吉水人祖省死靖難兵自有傳成化初禎由國子生授夔州通判二年荆襄石和尚流劫至巫山督盜同知王某者怯不救禎面數之若食朝廷祿忍委赤子虎口耶卽代勒所部民兵晝夜行至則城已陷賊方聚山中禎擊殺其魁三十三人餘盡遁乃行縣撫傷殘招潰散久乃得還甫三日賊復劫大昌禎趣同知行同知不應指揮曹能柴成與同知比激禎曰公爲國出力肯復行乎禎卽請往兩人酌酒賀僞許相左右禎上馬挾兩人與俱夾水陣旣渡兩人見賊卽

走禎被圍半日誤入渾中賊執欲降之禎大罵賊怒斷其喉及右臂而死從行者奉節典史及部卒六百餘人皆死自死所至府三百餘里所乘馬奔歸血淋漓毛盡赤衆始知禎敗往覓屍面如生子廣鸞馬爲歸費王同知得馬不償直樹旣行馬夜半哀鳴王同知起視之馬驟前嚙項持其胸翼日嘔血死人稱爲義馬事聞贈禎僉事錄一子能成皆被譴

萬琛字廷獻宣城人慷慨負氣節成化十三年舉於鄉授清江知縣弘治中補瑞金十八年正月劇盜大至縣人洶洶逃竄有勸琛急去者琛斥之率民兵數十人迎敵殺賊二十餘人相持至明日力屈被執罵不絕口賊攢刺之乃死贈光祿少卿賜祭葬子蔭時有王祐者爲廣昌知縣賊至民盡逃援

兵又不至祐拔刀自刳其腹曰有城不能守何生爲左右奔奪其刃後援兵集賊稍退越七日復突至祐倉皇赴敵死之楊忠寧夏人世官中衛指揮使以功進都指揮僉事廉介有謀勇正德五年安化王宣鐸反其黨丁廣將殺巡撫安惟學忠在惟學側罵曰狗賊敢犯上耶廣怒殺之迄死罵益厲忠同官李睿聞變馳至宣鐸所門閉不得入大罵爲賊所殺百戶張欽不從逆走至雷福堡亦被殺皆贈官贈陰表忠睿曰忠烈之門欽曰忠節之門

吳景南陵人弘治九年進士正德中歷官四川僉事守江津重慶人曹弼凶命播州糾衆寇川南謀與大盜藍廷瑞合六年正月逼江津御史俞縉遁去屬景及都指揮龐鳳禦之鳳邀景俱走景不可率典史張俊迎擊手殺三賊矢被面急收兵入保城已陷大呼曰寧殺我毋殺士民賊強之跪不屈遂被殺俊亦死巡撫林俊上其事詔贈景副使賜祭葬立祠江津世廕宣州衛百戶是月僉事王源行部川北會藍廷瑞鄒本恕等掠通巴至營山源率典史鄧俊禦之皆爲所殺贈源副使亦廕其子源五臺人弘治十二年進士明年正月賊麻六兒越百丈關將逼川東副使馮傑追擊於蒼溪俘斬頗衆日晡移營鐵山關賊乘夜衝突傑死之贈按察使賜祭葬諡恪愍世廕百戶而是時略陽知縣孫璽劍州判官羅明梁山主簿時植亦皆死於賊璽字廷信代州人舉於鄉連知諸城扶風縣都御史藍章以略陽漢中要地舊無城而其令嚴順

懦不足任檄壘往城之工未畢而賊至順欲去壘拔刀斫坐
几曰欲去者視此乃率寮屬堅守數日城陷壘被執大罵不
屈賊鬻殺之順逃去誣壘俱逃溺於江以他人屍斂壘子啟
視非是訟於朝勘得死節狀贈光祿少卿賜祭予廕抵順罪
明以吏起家鄴本恕逼其城與子介拒守城陷父子皆罵賊
死植字良材通許人由國子生授官時攝縣事賊方四等略
地植拒却之斬獲數十級踰月復至相拒數日城陷說降之
不屈脅取其印不予大罵被殺妻賈聞變卽自縊女九歲赴
火死明植皆贈恤如制而表植妻女爲貞烈本恕等攻剽城
邑所向崩潰其士民冒死殺賊者有趙趣徐敬之等應通袁
璋之屬趣梁山諸生賊攻城同友人黃甲李鳳何景蕭銳徐

宣楊茂寬趙采誓死拒守城陷皆死都御史林俊嘉其義立
祠祀之敬之亦梁山人流賊起衆推爲部長陷陣死俊爲文
祭之而題其墓曰忠勇義士應通嘉州人賊衝百丈關應通
父子七人倡義死戰被執慷慨就死無一乞憐者璋江南人
素以勇俠聞俊委勦賊所在有功後爲所執其子襲挺身救
之連殺七賊亦被執俱死襲死三日兩目猶睜視其父俊爲
詩挽之榜其門曰父子忠節總制彭澤爲勒石城隍廟祀於
忠孝祠

霍恩字天錫易州人弘治十五年進士歷知山陽安邑正德
時改上蔡六年賊四起中原郡邑多破殘畿內則棗強知縣
段豸大城知縣張汝舟河南則恩及西平知縣王佐葉縣知

縣唐天恩永城知縣王鼎裕州同知郁采固始丞曾基夏邑丞安宣息縣主簿邢祥惟寧主簿金聲丘紳西華教諭孔環山東則萊蕪知縣熊驂南畿則靈璧主簿蔣賢皆抗節死而恩佐采環死最烈恩與典史梁達共守當賊至時語妻劉曰脫有急汝若何劉願同死乃築臺解後約曰見我下城卽賊入矣及城陷恩提刀下城劉臺上見之卽自縊未絕復以簪刺心死恩被執賊脅之跪罵曰吾此膝肯爲賊屈乎賊日殺人於前以懾之罵益厲賊以刀抉其口支解之達自經死佐手殺賊數十人矢斃其渠帥賊忿急攻三日佐力屈被執罵不絕口賊懸諸竿殺而支解之采與都指揮詹濟鄉官任賢共堅守斬獲多城陷被執采罵賊不輟賊碎其輔頰而死濟

亦不屈死賢嘗爲御史方里居招邑子三千共守亦罵賊死一家死者十三人環被執賊曰呼我王卽釋汝環厲聲曰我恨不得碎汝萬段肯媚汝求活耶遂被殺牙正德時官兵科都給事中以黨劉瑾謫官賊至連戰却之及城陷中四矢一鎗瞑目大呼殺賊而死賊屠其城汝舟與主簿李銓迎賊戰爲所殺天恩與父政等七人俱死鼎城陷繫印於肘端坐待賊不屈死基被執使馭馬不從死之宣初授官賊楊虎逼其境或勸無往宣兼程進抵任七日賊大至拒守有功城陷死之祥已致仕城陷罵賊死聲紳與義士朱用之迎戰死驂爲賊所執與主簿韓塘俱不屈死蔣賢戰敗被執死之諸人死節事聞皆贈官賜祭予廕立祠如典制恩妻劉贈宜人建忠

節坊旌之用之亦被卹佐字汝弼潞州人舉人采字亮之浙江山陰人進士由主事謫教諭遷官環南宮人由歲貢生授來安知縣爲劉瑾黨所陷左遷豸字世高澤州人隸籍錦衣衛起家進士天恩鼎基宣祥聲紳驂蔣賢達塘皆無考時有鄭寶者爲鬱林州同知署北流縣事妖賊李通寶逼其城與子宗珪出戰皆死有王振者爲福建黃崎鎮巡檢海寇大至率三子臣朝實迎戰竟日伏兵起振被殺屍僵立三子救之臣重傷朝實皆死有蔡顯者爲萊州衛指揮僉事與三子淇英順俱禦盜力戰死皆予恤有差

孫燧字德成餘姚人弘治六年進士授刑部主事再遷郎中正德時歷河南右布政使當是時寧王宸濠有逆謀結幸臣錢寧中官張雄輩日夜調中朝事幸有變又劫持羣吏賂遣之使爲已用副使胡世寧暴其狀得罪惡巡撫王哲不附已毒之得疾乞歸踰年死董傑代哲僅八月亦死自是官其地者惴惴以得去爲幸代傑者任漢俞諫皆歲餘罷歸朝議欲得才節大臣燧在河南有聲以故共推用燧十年十月以右副都御史巡撫江西燧聞命歎曰是投我艱也當死生以之乃遣妻子還鄉止攜二僮入南昌南昌人洶洶謂宸濠旦暮且得天子諸黨附及羣盜相依倚作聲勢燧左右亦多爲耳目刺燧言動輒馳告而燧防察甚密卽左右不得窺時時爲宸濠陳說大義冀其警悟卒不悛陰察副使許達忠勇可屬大事多與謀又懲胡世寧事未敢訟言於朝託禦他寇曲爲

備先城進賢次城南康瑞州惠建昌縣多盜割其地別置安義縣以漸弭之而請復饒撫二州兵備撫不得復則請勅湖東分巡兼理之九江當湖衝最要害請重兵備道權兼攝南康寧州武寧瑞昌及湖廣興國通城以便控制廣信橫峯青山諸窰地險人悍則請設通判駐弋陽兼督旁五縣兵又恐宸濠劫兵器假討賊盡出之他所宸濠矚燧圖已使人語諸幸臣去燧而遺燧棗梨二物以示意燧笑却之達勸燧先發後聞燧曰奈何予賊以名且需之十三年江西大水宸濠素所蓄賊凌十一吳十三閔念四等出沒鄱陽湖燧與達密謀捕之三賊遁沙井燧自江外掩捕夜大風雨不克濟三賊走匿宸濠林墓間於是密疏白其狀且言宸濠必反章七上輒

爲宸濠遮獲不得達宸濠恚甚因宴毒燧不死燧乞致仕又不許日益憂懼數月髭髮盡白明年宸濠脅鎮巡官奏其孝行燧與巡按御史林潮冀藉是少緩其謀乃共奏於朝朝議方降旨責燧等會御史蕭淮盡發宸濠不軌狀詔重臣宣諭宸濠聞遂決計反六月乙亥宸濠生日宴鎮巡三司明日燧及諸大吏入謝宸濠伏兵左右大言曰孝宗爲李廣所悞抱民間子我祖宗不血食者十四年矣今太后有詔令我起兵討賊亦知之乎衆相顧愕眙燧直前曰安得此言果有詔請出示之宸濠曰毋多言我往南京汝當扈駕燧大怒曰汝速死耶天無二日吾豈從汝爲逆哉宸濠怒叱燧燧益怒張目直視宸濠起入內殿易戎服出麾兵縛燧諸司股栗達獨奮

曰汝曹安得辱天子大臣因以身翼蔽燧遂并縛達二人且縛且罵不絕口賊擊燧折左臂與達同曳出達謂燧曰我勸公先發者知有今日故也已遇害惠民門外巡按御史王金布政使梁宸以下咸稽首呼萬歲宸濠遂發兵僞署三賊爲將軍首遣婁伯徇進賢爲知縣劉源清所斬招黨賊賊畏守吏不得發大索兵器於城中不得賊多持白挺伍文定起義兵設兩人木主於文天祥祠率吏民哭之遂引軍與王守仁共平賊諸逋賊走安義皆見獲無脫者人於是益思燧功燧生有異質遇事挺然不撓兩目爍爍夜有光死之日天忽陰慘烈風驟起凡數日城中民大恐走收兩人屍屍未變黑雲蔽之蠅蚋無近者明年守臣上其事於朝未報世宗卽位贈

禮部尚書諡忠烈與達並祠祀南昌賜祠名旌忠各蔭一子世錦衣百戶等俱進千戶燧子堪在家聞父訃率兩弟焜陞赴之會宸濠已禽乃扶柩歸兄弟廬墓蔬食三年有芝一莖九葩者數本產墓上服除以父死難更墨衰三年世稱三孝子堪字志健爲諸生能文有膂力善騎射旣官錦衣中武會試第一擢署指揮同知善用強弩教弩卒數千人以備邊歷都督僉事事母楊氏至孝母年九十餘歿京師堪年亦七十護喪歸在道以毀卒贈都督同知巡按御史趙炳然上堪孝行得旌堪子鈺亦舉武會試官都督同知鈺子如津都督僉事焜字仲泉文學通贍以選貢生歷尚寶丞供事內閣理誥勅官至尚寶卿居母喪以毀聞陞官尚書焜孫如游大學士

如游孫嘉績僉事陞子鑑鑛皆尚書銓侍郎錄太僕卿鑪子
如法主事如洵參政並以文章行誼世其家世以此推餘姚
孫氏陞鑑鑛如游如法嘉績事皆別見

許達字汝登固始人正德三年進士長身巨口猿臂燕領沈
靜有謀略授樂陵知縣六年春流賊劉七齊彥名焚屠城邑
殺長吏諸州縣率閉門守甚者乞賊毋攻城遺之芻粟弓馬
或棄城遁達之官慨然為戰守計縣無城督民版築不踰月
城成使民於屋外築牆高過其簷啟圭竇才容人家令一壯
者執刃伺於竇內餘皆入隊伍令日守吾令視吾旗鼓違者
軍法從事又募死士伏巷中洞開城門賊果至旗舉伏發竇
中人皆出賊大驚走斬獲無遺後數犯數却之遂相戒不敢

近事聞進秩二等時知縣能抗賊者益都則牛鸞郟城則唐
龍汶上則左經濟則陳滯然所當賊少而達累禦大賊有功
遂與鸞俱超擢兵備僉事達駐武定州轄旁近諸州縣至則
城圯溝平不格牛馬達築城鑿池設樓櫓置巡卒明年五月
賊楊寡婦以千騎犯濰縣指揮喬剛禦之賊少却達追敗之
高苑令指揮張勛邀之滄州先後俘斬二百七十餘人未幾
賊別部錢鸞以百騎掠德平達盡殲之威名大著十二年遷
江西副使時宸濠暴橫甚達每繫其黨繩以法嘗言於孫燧
曰寧王敢為暴者恃權臣也權臣左右之者貪重賄也重賄
由於盜藪今惟翦盜則賄息賄息則交解交解則黨孤不然
後難圖也燧深然之每事輒與密議及宸濠反縛燧達爭之

宸濠素忌達問許副使何言達曰副使惟赤心耳宸濠怒曰我不能殺汝耶達罵曰汝能殺我天子能殺汝汝反賊萬段磔汝汝悔何及遂并縛達曳出斫其頸屹不動賊眾共推抑令跪卒不可得遂死年三十六初達以文天祥集貽其友給事中張漢卿而無書漢卿語人曰寧邸必反汝登其為文山乎達父家居聞江西有變殺都御史副使即為位易服哭人怪問故父曰副使必吾兒也世宗即位贈左副都御史諡忠節廕一子世錦衣千戶又錄山東平賊功復廕子百戶嘉靖元年詔達死事尤烈而燧未愜物論將罷燧祀專祀達廷議請改贈達禮部尚書進廕指揮僉事易主居燧左久之復如初長子場好學有器識既葬父日夜號泣六年而後就廕人

或詣之場曰吾父死場乃因得官痛哭不能仰視場與燧諸子皆以孝稱場子郊事親孝隆慶中舉於鄉數試禮部不第有試官與場婚姻慕郊才欲物色之郊曰若此何以見先忠節地下許氏子孫不如孫氏貴顯然亦能傳其家當宸濠初發難殺孫許盡劫諸司下獄奪其印參議黃宏主事馬思聰並抗節死死稍後者復有宋以方

黃宏字德裕鄞人著籍孝陵衛舉弘治十五年進士知萬安縣民好訟訟輒禱於神宏毀其祠曰今在何禱也訟者至輒片言折之用才調泰和遷戶部主事歷江西左參議按湖西嶺北二道王守仁討橫水桶岡賊宏主餉以功加俸一等賊閔念四既降復恃宸濠勢剽九江上下宏發兵捕之走匿宸

濠祖墓中盡得其輜重以歸宸濠逆節益露士大夫以爲憂
宏正色曰國家不幸有此我輩守土死而已民有持大義不
從宸濠黨者宏每陰左右之及反被執宏憤怒以手梏向柱
蹙項是夕卒賊義而棺斂之子紹文奔赴求得其棺以僞命
治斂非父志亟易之扶歸馬思聰字懋聞莆田人弘治末舉
進士爲象山知縣復二十六渠溉田萬頃改知平鄉治戰守
具盜不敢犯遷南京戶部主事督糧江西駐安仁值宸濠生
日或勸弗往思聰曰吾欲覘之疾報天子耳被執繫獄不屈
絕食六日死世宗立贈宏太常少卿思聰光祿少卿並配饗
旌忠祠嘉靖二年江西巡撫盛應期言前副使周憲討賊遇
害宜如宏思聰例祀之旌忠祠而御史鄧顯麒謂宏思聰死

節非真不當祀俱下禮官議遂奪二人贈官并罷配祀而祔
憲忠烈祠明年給事中毛玉勘江西逆黨請表章宏思聰及
承奉周儀又六年宏子紹武訴於朝下所劄核實巡按御史
穆相列上二人死節狀甚悉禮部尚書李時等請復贈官配
祀帝難之下廷臣博議無異言乃報許憲安陸人弘治六年
進士除刑部主事進員外郎十七年坐事下詔獄謫兗州通
判正德初復故官歷江西副使華林馬腦賊方熾承總督陳
金檄勦禽數百人移軍奉新計禽賊首胡雪二平馬腦砦華
林賊懼分立仙女砦拒守憲進克之賊又立砦雞公嶺復爲
憲所拔先後斬獲千計逼華林遏其奔軼賊窘遣謀者詭言
饑困狀憲信之移檄會師夾擊他將多觀望憲攻北門三戰

賊稍却與子幹先登逼之賊下木石如雨軍潰憲中槍幹前
救力戰墮崖死憲創重被執罵不絕口為賊支解久之事始
聞贈按察使子祭葬謚節愍廕子錦衣世百戶旌幹門曰孝
烈後六年從給事中李鐸言命有司歲給其家米二石帛二
匹

宋以方字義卿靖州人弘治十八年進士除戶部主事歷郎
中數權關稅理倉督逋賦並以清勤聞正德十年遷瑞州知
府時華林大盜甫平瘡痍未復以方悉心撫字吏民愛之宸
濠逆謀有萌而瑞故無城郭以方築城繕守具募兵三千日
夕訓練宸濠深忌之有徵索又堅拒不應以是積忤迫鎮守
劾繫南昌獄其明日宸濠反破獄出以方脅之降不可械舟

中與俱行至安慶兵敗問地何名舟子言黃石磯江西人音
則王失機也宸濠以為不祥遂斬以方祭江後賊平其子崇
學行求遺骸不得乃斂衣冠歸葬之嘉靖六年有為宸濠駕
舟者目覩以方之死為人言之巡撫副都御史陳洪謨之去
事詔贈光祿卿廕一子立嘉忠祠瑞州以祀之方宸濠之反
江西也所存惡少年多入其黨抗賊者卒遇害前後不可勝
紀其可知者萬木鄭山俱新建人宸濠遣闖校四出籍民田
益收縛豪強不附者以去木與山集鄉人結砦自固賊黨謝
重一馳馬入村執之積葦張睢陽廟壇前縛重一并馬生焚
之濠黨不敢犯二人飲江上為盜凌十一所逼趣見宸濠烙
而椎之皆罵賊死趙楠南昌諸生也兄模嘗捐粟佐賑宸濠

夜捕模索金楠代模往脅以威不屈被掠死同邑辜增見迫
抗節不從一家百口皆死諸生劉世倫儒士陳經官義士李
廣源皆被掠不屈死葉景恩者以俠聞族居吳城宸濠將作
難捕景恩脅降之不從死獄中宸濠兵過吳城景恩弟景允
以三百人邀擊賊分兵焚劫景允家其族景集景修等四十
九人皆死又有閩順者爲寧府典寶副宸濠將反順與典膳
正陳宣內使劉良微言不可爲典寶正涂欽所譖三人懼誅
潛詣京師上變羣小庇宸濠反下之詔獄撈掠備至宸濠聞
三人赴都慮事泄誣奏其罪且嗾羣小必殺之會已各決五
十遣戍孝陵乃免世宗立復官

明史藁

列傳第一百六十五

